



## Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ  
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial  
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով  
ձևափոխել կամ օգտագործել առկա նյութը ստեղծելու համար նորը

You are free to:

**Share** — copy and redistribute the material in any medium or format

**Adapt** — remix, transform, and build upon the material

364





NOV 20.

M A R S

891.992-3

U-37

Ք Ո Յ Ր Ը



Պ Ա Տ Կ Ե Ր

1001  
2608

Հրատ. Յ. ՅՈՎՍԷՓԵԱՆԻ



Բ Ա Գ Ո Ւ  
ՏՊԱՐԱՆ ԵՂՔ. ՂԱԶԱՐԵԱՆՆԵՐԻ

1902.



26 25. 2013

42800

7 8 11 9

Дозволено Цензурою  
11 Июля 1902 г., г. Тифлисъ.



ՀՐԱՏԱՐԱԿՁԻ ԿՈՂՄԻՑ

391

Ի նկատի առնելով, որ առանց այն էլ մեր սակաւաթիւ հեղինակների մեծ մասը զուրկ լինելով նիւթական միջոցներից, անկարող են առանձին գրքերով լոյս ընծայել իրենց աշխատութիւնները. որ այդ հեղինակների աշխատութիւնները մեծ մասամբ լոյս տեսնելով պարբերական մամուլի բանասիրականներում, հարեանցօրէն են կարգացում, երկար ընդմիջումներով և որոշ տպաւորութիւն չը թողնելուց յետոյ էլ, ժամանակի ընթացքում մոռացութեան են տրուում. որ՝ ըստ մի տեսակ օրէնք դարձած սովորութեան, պարբերական մամուլի էջերում լոյս տեսած վէպերը, պատկերները և գրոյցները չեն ենթարկուում քննադատութեան ի վնաս թէ ընթերցող հասարակութեան և թէ իրենց՝ հեղինակների. և՛ վերջապէս՝ համոզուած լինելով, որ քաջալերութիւնը և լուրջ կրիտիկան ձեռք ձեռքի տուած ընդունակ են հանդէս բերելու եթէ ոչ



վիպական հանճարներ, գոնէ տաղանդներ.

Վճռեցի հետզհետէ լույս ընծայել պ. Mars-ի (Սըշակ) թերթերի բանասիրականներում տպուած կամ անտիպ աշխատութիւնները և ահա սրանով ընթերցող հասարակութեան սեղանի վրայ եմ դնում նրա «Քոյրը»:

Թո՛ղ «Քոյրը»-ն ինքը խօսի իւր մասին և ինքը հարթի իւր ճանապարհը, իւր ասպարէզը:

Յ. ՅՈՎՍԷՓԵԱՆ:

Ք Ո Յ Ր Ը

I.

Յուլիս ամսի վերջերքում, մի կիրակի օր էր: Այդ օրը այնքան պարզ ու գեղեցիկ էր, որ քաղաքի բնակիչներից մեծ մասը բեռնաւորուած Շերքէթի շոգենաւերի վրայ, շտապում էին կղզիների ու արուարձանների կանաչ թաւուտքի մէջ և աղբիւրների եզերքում ժամանակ անցնելու: Բայց կէս օրին մօտ բարձրացաւ մի ուժգին քամի և Բոսֆորի մանրակազոյն պարզ երկնակամարը յանկարծ մթագնեց: Սև և մռայլ ամպերի ահագին քուլաները գլորուելով ու թաւալելով գալիս անցնում էին քաղաքի վրայով: Արևը վաղուց արդէն թազնուել էր սև սաւանի ետև, իսկ մի ժամ առաջ արևի ճառագայթների հետ գիրկընդխառն խաղացող նեղուցը փրփրել, կատաղել էր: Կապուտակ ջուրը, կարծես ոտքի ելած, խուժում էր դէպի ավերը և կրկին նահանջում սոսկալի աղմուկով: Թուխպը վերևից ճնշուելով աստիճանաբար իջնում էր ցած, մի



տեսակ երեքուն քողի տակ թաղելով ամբողջ Կ. Պօլիսը: Կարճ ժամանակից յետոյ, երկու քայլի վրայ դժուար էր մի բան տեսնել. հսկայական շէնքերը և մզկիթների բարձր մինարէթները լողացող թուխսի տակ ուրուականի ձև էին ստացել և նրանց նայողին թւում էր, թէ այդ ուրուականները վազում են դէպի ինքը:

Սպասում էր սարսափելի փոթորիկ: Քամին գնալով սաստկանում էր և փչում առանց որոշ ուղղութեան: Հարաւից ու հիւսիսից փչող քամիները կարծես այդտեղ բաղխում, գրկում էին և ամբողջ ծանրութեամբ ընկնում քաղաքի վրայ: Հըսկայական ծառերը ճկվում էին, շէնքերը դողում, ալիքները մի ըսպէ տափակում էին: Մերթ ընդ մերթ լսում էր հեռուից երկնային ահեղ որոտ, որ արձագանք տալով թանձրացած մթնոլորտում, ստորերկրեայ ուժգին թնդիւնների տպաւորութիւն էր թողնում: Եւ արդէն քամու հոսանքի հետ երբեմն ցած էին ընկնում անձրևի ծանր ու խոշոր կաթիլներ, գուշակել տալով, որ փոթորիկը շատ էլ հեռու չէ: Առաւօտուայ գեղեցիկ եղանակից խաբուած բազմութիւնը, գլուխը կորցրած, շտապում էր նաւամատուցները փոթորկին կանխելու և իրենց տները դառնալու համար:

Շոգենաւի սպասող մի այդպեսի բազմութեամբ լիքն էր նաև Բէօյուկ-Պարէի նաւամատուցը, երբ

Շերքէթի 42 թիւ շոգենաւը Գաւաքից գալով, դարձաւ Մէզար-Բուրնին և գինով մարդու նման աջ ու ձախ երեքալով, կանգ առաւ նոյն նաւամատուցի առաջ:

Բազմութիւնը անկարգ հրմշտումով ներս խուժեց: Մի ըսպէ շոգենաւի վրայ տիրեց խառնաշփոթութիւն, իրարանցում, բաց շուտով իւրաքանչիւրը իւր համար տեղ գտաւ ու խաղաղութիւնը վերականգնեց:

Առաջին կարգի կայուսներէից մէկում վաղուց նստած էր մի երիտասարդ, որի երկայն մազերը ցույց էին տալիս, որ օտարական է: Նա մտել էր շոգենաւը Գարաքէօյի կամուրջից Բոսֆորի վրայ պտույտ անելու և նրա գեղարուեստական շքեղ ափերը դիտելու, որի մասին այնքան բան էր լսել ու կարդացել: Սակայն եղանակը անսպասելի կերպով փոխուելուց յետոյ, անկարելի լինելով տախտակամածի վրայ մնալ ու շուրջը դիտել, սկսեց փակուել էր կայուսում: Գարաքէօյի կամուրջի ստահակը արագրավաճառներից նա գնել էր մի համար «Le petit journal» և «Արևելք»-ի վերջին համարը: Առաջինը ծնկների վրայ դրած, կրկին ձեռքն էր առել «Արևելք»-ը ու կարդում էր, ըստ երևոյթին ձանձրոյթը փարատելու մտքով, երբ շոգենաւը մօտեցաւ Բէօյուկ-Պարէի նաւամատուցին և քիչ ժամանակից յետոյ նոյն կայուսը մտան նախ երկու կին



և ապա մի քանի թուրք սպաներ:

Կանանցից մէկը միջահասակ էր, միջին տարիքով և բնականից աւելի հաստ ու գէր մարմնով, որ արգելք դառնալով ազատ շարժումներին, դարձնում էր գանդաղաշարժ: Կլորիկ և հասակից աւելի առույգ դէմքը համակրելի արտայայտութիւն ունէր, թէև վերին շրթունքի վրայ բուսած սև մազերը մի տեսակ առնական կերպարանք էին տալիս այդ կանացի դէմքին:

Կանանցից երկրորդը մի տասնութ-տասնութ տարեկան աղջիկ էր, դէմքի նուրբ ու քնքով զծագրութեամբ, աչքերի խելօք նայուածքով և լայն, արտայայտիչ ճակատով:

— Օ՛հ, ի՞նչպէս եղանակը յանկարծ փոխուեց, լաւ էր, Զարէլ, որ ժամանակին շողենաւ մտանք և փոթորկից ազատուեցինք, ծանր մարմինը Արմենակ Բէկեանի (այսպէս էր կոչւում երիտասարդը) հանդիպակաց նստարանի վրայ վայր թողնելով, ասաց տիկինը:

— Այո՛, մայր... պատասխանեց օրիորդը և իւր ու մօր վերարկուն կեռից քարշ անելով, ինքն էլ տեղաւորուեց նրա կողքին:

— Ս.մենեին լաւ բան չեղաւ, աւելացրեց մայրը մտազբաղ կերպով և — ապա կարծես աղջկայ տրամադրութիւնը հասկանալու համար, խօսքն ուղղեց նրան:

— Ինձ թւումէ թէ դա լաւ նշան չէր, Զարէլ:

Զարէլը մօր հարցերին պատասխանելուց խօյս տալու մտքով, վեր ելաւ, լետ քաշեց նեղ լուսամուտի վարագույրը, նայեց դատարկ նաւամատուցին և կրկին բռնեց իւր տեղը:

Մայրը խօսքը նորոգելու համար յարեց.

— Նրանք գուցէ երկար սպասեն մեզ:..

— Ե՛հ, թո՛ղ սպասեն... ես ուրախ եմ, որ այսպէս պատահեց:

— Ուրախ ես... .

— Այո՛... ճիշտ ասած, մայր, ես ակամայ եկայ:

— Ի՞նչպէս թէ ակամայ:

— Պատճառը չեմ կարող ասել, որովհետև... չը գիտեմ, բայց սիրտս հենց սկզբից արգելում էր ինձ:

— Այդ ի՞նչէր ես խօսում, Զարէլ, վշտացած շեշտով հարցրեց մայրը:

— Ես ասում եմ սրտիս թելադրածը... մայր, չէ որ ես այլևս երեխայ չեմ... .

Մայրը յանդիմանական մի նայուածք ձգեց աղջկայ վրայ ու լռեց:

Օրիորդը մօր այդ նայուածքից կարմրելով, ցած թողեց գլուխը և ընկալական շփոթումն ու ներքին ամբոխմունքը ծածկելու նպատակով սկսեց խաղալ հովանոցի կոթից քարշ ընկած փնջիկների հետ:

Կարճ խօսակցութեան վերջին պարբերութիւնը



հետաքրքրեց Բէկիեանին, մանաւանդ գրանով նա իմացաւ, որ հայուհիներ են: Պօլիս գալուց ի վեր, առաջին անգամն էր, որ հայուհու էր հանդիպում և արևմտեան հայուհու շրթունքից լսում էր մայրենի քաղցր բարբառը: Բէկեանը հովանոցը կայուտի անկիւնում տեղաւորելու պատրուակով բարձրացրեց գլուխը և նայեց օրիորդին, որ դեռ շարունակում էր հովանոցի փնջիկների հետ խաղալ: Նրա բարձր ու շնորհալի հասակը, լայն ու ճոխ ուսերքի վրայ բարձր բռնած գլուխը, որ պսակուած էր հարուստ մագերի սիրուն ալիքներով, միացած նրա դէմքի խելօք ու լուրջ արտայայտութեան և աչքերի հեզ նայուածքի հետ, տալիս էին նրան չը գիտես ի՞նչ մի բացառիկ վեհուածիւն, որ ընդունակ է ամենագոռոզ սրտերն իսկ նուաճելու: Փոքրիկ ու խիստ շնորհալի ձեռքերի կլորիկ մատներից մէկի վրայ փայլում էր միակ մատանիի խոշոր ադամանդը, իսկ հասուն ու ճոխ կրծքից քիչ վեր, կիսաբաց օձիքի վրայ, ամբացած էր սիրոյ սուրհանդակը—մի ոսկի թռչնիկ, որի փոքրիկ կտուցին բռնած ոսկեայ փակ ծրարի վրայ, շողշողում էր փոքրիկ ադամանդներով բանուած Souvenir բառը:

Բայց այս բոլորի մէջ, աւելի աչքի զարկողը օրիորդի արծուեռունգ քիթն էր, որը՝ Բէկեանի կարծիքով, չէր կարող մի ուրիշ դէմքի այնքան յար-

մարել, այնքան գեղեցիկ ներդաշնակութիւն կազմել, որքան Չաբէլի ձուածե գէմքին:

Բէկեանը նստած, կրկին ձեռքն էր առել լրագիրը, բայց չէր կարգում: Նրա միտքն աւելի զբաղուած էր մօր և աղջկայ մէջ տեղի ունեցած կարճ խօսակցութիւնով, մանաւանդ օրիորդի վերջին բառերով թէ «ես ասում եմ սրտիս թելադրածը» . . .

Եւ Բէկեանը ինքն իրեն հարցրեց.

— Ի՞նչ կը նշանակի այդ:

Ու աշխատեց լուծել այդ հարցը ոչ այնքան հողբեանօրէն, որքան իրաւաբանօրէն:

Բայց հենց այդ ժամանակ տեղի ունեցաւ մի միջադէպ:

## II

Թուրք սպաները, որ բռնել էին նոյն կայուտի միւս անկիւնը, դուրսը սկսած խօսակցութիւնը վերջացնելով, սկսեցին խօսել եղանակի լանկարձական փոփոխութեան և նեղուցի ալեկոծութեան մասին, որ՝ մանաւանդ այդքան միգապատ եղանակում, այնքան վտանգաւոր էր: Նրանցից մէկը ընկերների երկիւղը փարատելու համար գովեց 42 թիւ շողենաւի նաւապետ Հիւսնի էֆէնդիի ճարտարութիւնը, իւր գովասանքին կցելով նաև զա-



նագան էպիգօղներ նաւապետի կեանքից: Ապա խօսքն աննկատելի կերպով դարձաւ Գուժ-Քաբուի ծանօթ գէպքին Ս. Աշքեան Պատրիարքի օրով, որ տեղի էր ունեցել նոյն ամսի տասնուհինգին: Եւ պատմելով միմիանց վիրաւորական մի քանի էպիգօղներ, զրոյցին տուին ծաղրական կերպարանք:

Խօսակցութիւնն՝ իհարկէ՝ հայերի մասին էր և՛ թէև նրան տուել էին սրիկայական անվայել ձև, բայց անհատական վիրաւորանքի բնաւորութիւն չունէր: Որով ոչ այնտեղ նստած հայ կանայք, ոչ էլ Բէկեանը իրաւունք համարեցին իկարգ հրաւիրել նրանց, թէև այդ վիրաւորանքը խիստ ծանր էր գալիս մանաւանդ Բէկեանին:

Բայց շատ չանցած, սպաները, կարծես լսողներին համբերութիւնից հանելու մտքով, նախ՝ հայ կանանց հասցէին՝ ընդհանրապէս, ապա օրիորդի հասցէին՝ մասնաւորապէս, անվայել բառեր շարժեցին:

Ու տեսնելով, որ օրիորդը կարմրում է, նրանք, խօսք մէկ արած, բոլորը միասին հռհռացին:

Բէկեանը, կարծես վազուց գուշակելով սպաների միտքը, մի քանի ըոպէ էր, ինչ կանգնել էր փոքրիկ լուսամուտի առաջ և հեռագիտակով նայում էր Բուժելի-Հիսարի հարուստ տեսարաններին, որի բարձրութեան վրայ կառուցուած է Ռօբերտ կոլլէջը: Սակայն նա երբէք չէր կարող կարծել, թէ

կը վիճակուի իրեն լսել այնպիսի բառեր, որոնք քաղաքակիրթ երկիրների հասարակաց աներուժն անգամ արգելուժ են: Նա մի ըոպէ շփոթուեց, ձեռքերը գողացին և քիչ մնաց, որ հեռագիտակը ցած պիտի ընկնէր: Այնուամենայնիւ երևակայելով օրիորդի դրութիւնը, մի կերպ ինքն իրան տիրապետեց: Որպէս տղամարդ, մանաւանդ որպէս հայ, նա ամաչում էր երես առ երես նայել օրիորդին և աշխատում էր չը լսած, չը հասկացած ձևանալ:

Այնուամենայնիւ Չաբելի մայրը չը համբերեց. նա քաղաքավարութեամբ դարձաւ սպաներին զգուշացնելով, որ իրենց խօսքերին չափ, սահման դնեն . . .

— Դուք պարտաւոր էք քաղաքավարութեան օրինակ հանդիսանալու, այսպէս վերջացրեց նա իւր խօսքը:

— Հայդէ, գեաւուր, ասաց նրանցից մէկը և կրկին ամենքը միաձայն հռհռացին:

— Ձեր արածը լրբութիւն է, յանդիմանեց տիկինը բարկութեամբ, — եթէ չը դատարէք, ստիպուած կը լինեմ ոստիկանութեան դիմելու:

— Ոստիկանութեան, օհօ . . .

Եւ սկսեցին օգային համբուրներ զրկել օրիորդի հասցէին, խառնելով աւելի լիտի բառեր:

Չաբէլը, որ մինչև այդ ժամանակ ամօթից կարմրած դէմքը չը գիտէր ո՞ւր և ինչպէս թափ-



ցընել, վիրաւոր առիւծի նման յանկարծ վեր ցատկեց և հովանոցի միւս ծայրից բռնելով, կոթը բուր որ ոյժով իջեցրեց նրանցից մէկի գլխին:

Բէկեանը յետ դարձաւ: Նա յուզումից գունատուել էր ինչպէս ծեփ, իսկ երկու յոնքերի մէջտեղ, ճակատի վրայ առաջ էր եկել ուղղահայեաց մի խոր գիծ, կարծես գլուխը երկուտասպակ լինելու վրայ էր: Նա ձեռքը տարաւ անդրավարտիկի ետևի գրպանը և ջղաձգօրէն ցնցուող ափի մէջ ինչ-որ սեղմելով, յարձակողական դիրք բռնեց: Այդ ըոպէին նրա գլխով կայծակի արտառութեամբ անցաւ այն միտքը թէ օրիորդի հասցրած վիրաւորանքին չը պիտի դիմանան, թէ սպաները սուր պիտի քաշեն, առաջ պիտի գայ իրարանցում, արիւնհեղ կռիւ, երբ ինքը ստիպուած պիտի լինի գէնքով պաշտպանելու կանանց պատիւը և կեանքը...

Բայց պատահեց սրա ճիշտ հակառակը, որը Բէկեանի բորբոքուած արիւնի մէջ կարծես սառը ջուր խառնեց:

Սպան, որի գլխին իջել էր հարուածը, շտապով վերառաւ հովանոցի կտորուած կոթը և ասաց.

— Սուէք ձեր գէնքի կտորը, քիււ չիււկ հանը մ, որով ուզում էիք գլուխս փշրել... առէք, կրկին խփէք... ձեր ձեռքից հարուած կրելը շատ քաղցր է ինձ:

Ու լիբբ ժպիտը երեսին փորձեց մօտենալ

օրիորդին, որը դէմքն ափերի մէջ առած, խուլ կերպով հեկեկում էր:

Բէկեանը մի ոստիւն գործելով, կտրեց սպալի ճանապարհը և դուրս խլեց նրա ձեռքից հովանոցի կտորը:

— Ստոր արարածներ, ասաց նա բարկուածիւնից սեղմուած ակունների մէջից:

— Ինչ իրաւունք չունես մեր գործերին խառնուելու, նկատեց սպան և նայեց միւս սպաներին կարծես նրանց կարծիքն իմանալու իւր ասածի վերաբերմամբ:

— Ես իրաւունք չունիմ...

— Այո՛, դու...

— Ես վաղուց իրաւունք ունէի, բայց չարեցի, մտածելով թէ վերջապէս վերջ կը դնէք ձեր լկտի վարմունքին... բայց այդ խոհեմութիւնը չունեցաք... Տեսնում եմ, որ դուք լռող քաջերից չէք, այն քաջերից, որոնք սուր են կրում, առանց նրա պատիւը հասկանալու, այն քաջերից, որոնց քաջութիւնը թոյլ և անգոր արարածներին վախեցնելուց այն կողմն չի անցնում:

Սպաները ագին ժողոված կատուի նման քաշուեցին իրենց տեղերը, բայց իսկոյն սկսեցին սովորական անպատկառութեամբ ծիծաղել:

Արմենակը, որ նույպէս պատրաստուած էր նրատել, անվեհեր դիրք բռնելով և աղճատուած



թուրքերէնով նկատեց.

— Ծիծաղեցէք, որքան կուզէք, դրանով ապացուցանում էք, որ վախկոտ նասրաստակի սիրտ ունէք, որ կատուներ էք, որոնք մի մի առիւծներ են մկների առաջ միայն:

Սպաները դարձեալ ծիծաղեցին: Բէկեանը այս անգամ այլևս ուշադրութիւն չը դարձրեց. նա նըստելով իւր տեղում, ձեռքն առաւ «Արևելք»-ը:

Այդ ժամանակ շոգենաւը կանգ առաւ Օրթաքէօլի նաւամատուցի առաջ: Սպաներից մէկը դուրս գալով, մի քանի ըոպէից լետոյ կրկին ներս մտաւ, իւր հետ բերելով թրքական ոստիկանների մի ասագին վոհմակ:

III

Այդ միջադէպը, որին ակամայ հանդիսատես եղաւ և մասնակցեց Բէկեանը, այնքան ծանր սպաւորութիւն թողեց նրա վրայ, այնքան զօրեղ կերպով լուղեց նրան, որ լրագրական տառերի ու տողերի մէջ էլ տեսնում էր անսլատկառ սպաների պատկերը: Բայց ըստ երևոյթին մեծ ճիգէր գործ զնում իւր վրայ ներքին վրդովմունքը խեղդելու, աշխատում էր միտքը կենդրոնացնել բոլորովին ուրիշ կողմի, ուրիշ առարկայի վրայ:

— Բայց չէր լինում, չէր լաջողում իրեն:

«Արևելք»-ը ցած դնելով կրկին ձեռքն առաւ «Le petit journal»-ը աւելի նրա ծաղրանկարներով, քան բովանդակութեամբ զբաղուելու, երբ մէկը կանգնեց նրա առաջը:

Դա մի բարձրահասակ թուրք էր, երեսը մաքուր ածելած և քաղաքացիական հագուստով: Գլխին կրում էր «համիդիէ» կոչուած վարդագոյն բարձր ֆէս, թեքած դէպի լետ, դէպի ծոծրակը, ի ցոյց դնելով մերկ ճակատը: Ձեռքին կրում էր մի դալար մտրակ, իսկ ոտքերին երկարավիզ կօշիկներ: Այս տարագի մէջ նա շատ նման էր ձիուց նոր իջած ճանապարհորդի: Բայց նա ձիաւոր չէր, այլ գաղտնի ոստիկան, լրտես, թրքական բառով հ ա ֆ ի է:

Մի ըոպէի մէջ կայուտը շրջապատուեցաւ ոստիկաններով ու ոստիկանական զինուորներով, հրացաններով զինուած: Մի քանիսը նրանցից հաֆիէի հետ ներս էին մտել և կանգնել նրա ետևում: Ոստիկանութեան ներկայութիւնը շոգենաւում բուռն հետաքրքրութիւն գարթեցրեց ճանապարհորդների մէջ և լուրը բերնէ բերան անցնելով ասագին իրարանցում յառաջ բերեց: Շոգենաւի զանազան ծակուծուկերից, անկիւններից դուրս թափուելով, ամենքն էլ շտապում էին դէպի հետաքրքիր դէպքի կողմը: Հարիւրաւոր մարդիկ շոգենաւի մի կողմի վրայ խոնուելով, իրենց ծանրու-

1001  
8096





Թեան տակ թեքել էին նրան մի կողմի վրայ, որ խիստ վտանգաւոր էր մանաւանդ ծովի ալեկոծուած ժամանակ: Նաւապետի յորդորները անկարող եղան բազմութեան խուժումը դադարեցնել, ուստի հարկ համարուեցաւ դիմելու մտրակների և հրացանի կօթերի օգնութեան:

Օր. Ջաբէլը մի ըոպէ մոռանալով իրեն հասած վերաւորանքը, շունչը իրեն քաշած, ձեռքը կրծքին սեղմած, նայում էր մէկ Բէկեանին, որ՝ արտաքուստ անտարբեր, թերթում էր պատկերազարդ թերթը, մէկ լրտեսին, որ սպաներից ոչ պակաս անպատկառ ու մի տեսակ տիրական դիրքով կանգնել էր կայսուտի մէջտեղում, Բէկեանի առաջ: Ու յուսահատութիւնից ճմլում էր նրա սիրտը:

Մայրը բոլորովին գունաթափ, թեթեակի թինկնել էր բազմոցի կռնակին և մտքում նախատում էր աղջկանը, որ սպային խփելով, գործը մեծացրել էր, հասցնելով այդ սպառնական վիճակին: Որպէս բուն Պօլսեցի թրքական ոստիկանական և դատարանական սպօրինութիւնների մասին բազմաթիւ օրինակներ ու փաստեր ունէր, որոնց վրայ հիմնուելով, երիտասարդին կորած էր համարում, իսկ իրենց՝ խայտառակուած:

Իսկ Բէկեանը ամենեւին նշանակութիւն չէր տալիս. նա թերթում ու կարդում էր ձեռքի լրագիրը, որպէս թէ այդ իրարանցումը իւր հետ ոչ

մի առնչութիւն ունենալիս չը լինէր:

— Պարոն, է պարոն... ձայն տուեց լրտեսը:

Արմենակը ոչ մի շարժում չարեց, ձևանալով թէ չի լսում և չի հետաքրքրուում:

— Սինեօր, է սինեօր, չէք լսում:

Բէկեանը դարձեալ լուռ էր ու անշարժ, որը խիստ զայրացնում էր ոչ միայն լրտեսին, այլև թուրք սպաներին:

Ջաբէլը յուսահատաբար տրորում էր ձեռքերը, իսկ մայրը զարմանում երիտասարդի անտարբերութեան վրայ, որ յանդգնում էր արհամարել տէրութեան պաշտօնեային և չը պատասխանել նրան:

— Monsieur! չէք լսում, ձեզ հետ եմ, բարկացած գոչեց լրտեսը աւելի մօտենալով:

Արմենակը բարձրացրեց գլուխը և նայեց ուղիղ լրտեսի աչքերի մէջ:

— Ի՞նչպէս է ձեր անունը:

— Ո՞վ է անունս հարցնողը, արհամարական շեշտով հարցրեց Բէկեանը:

— Այդ դու յետոյ կիմանաս, որպէս և մենք կիմանանք քո անունը, ո՞վ և ի՞նչ լինելդ... այժմ ասա՛, ի՞նչպէս համարձակուեցար անպատուել Վեհափառ Սուլթանի սպաներին:

— Որովհետև ձեզ չեմ ճանաչում, ուստի չեմ էլ պատասխանում:



Ու կրկին ձեռքն առաւ «Le petit journal»-ը  
Լրտեսը դառնալով սպաներին ասաց.

— Սնպատճառ հայ կ օ մ ի տ է ի անդամներէց  
է... նայեցէք երկայն մազերին ու սուր մօրու-  
քին... դրանք յայտնի նշաններ են. որով ճանա-  
չում են միմիանց... Ֆէսագներ...:

Ու կրկին դարձաւ Բէկեանին:

— Հայդէ, վեր ել...

Բէկեանը բարձրացրեց գլուխը և բարկութիւ-  
նից վառուող աչքերը ձգեց լրտեսի վրայ:

Սպա զսպուած ձայնով ասաց.

— Սաացի, որ ձեզ չեմ ճանանչում, հետեա-  
պէս չեմ կարող ո՛չ պատասխանել, ո՛չ էլ հետեւել  
ձեզ:

— Իսկ ես հրամայում եմ վերկենալ, հայդէ...  
երկար սպասելու ժամանակ չունեմ, շուտով Բէ-  
շիկթաշ կը հասնենք:

Եւ ձեռքը մեկնեց օձիքից բռնելու:

Սրմենակը սաստիկ թափով հեռացրեց նրա  
ձեռքն իրենից և պատուիրեց զգոյշ և քաղաքա-  
վարի լինել:

— Տեսնո՞ւմ էք սրա յամառութիւնն ու պա-  
տասխանները... չասացի՞, որ կ օ մ ի տ է ի անդամ-  
ներէց է... անպատճառ Փաթրիք Էֆէնդիի դէմ  
ցոյց անողներէց մէկը լինելու է, որին որոնում  
են... է, սինեօր, ասում եմ վերկաց, ապա թէ ոչ,

քարշտալով կը տանեմ:

Լրտեսի այս սպառնական խօսքերի վրայ Զա-  
բէլի սիրտը դող առաւ և մտածում էր; թէ ինքն  
ինչ դիրք պէտքէ բռնի, եթէ լրտեսը մտածի խօս-  
քից զործի անցնել:

— Քարշ տա՛լ... հեզնական ժպտով կրկնեց  
Բէկեանը և աւելացրեց.

— Դուք քարշտալ կարող էք ձեր անպաշտ-  
պան հպատակներին միայն, իսկ ինձ՝ ո՛չ, առանց  
արժանաւոր պատիժ կրելու:

— Դուք անցագիր ունի՞ք:

Բէկեանը մտածեց բացասական պատասխան  
տալ, բայց միտքը փոխելով պատասխանեց.

— Իհարկէ... և իմ անցագիրը ցոյց տալու  
պատիւը միայն կարող եմ անել ձեզ, այն էլ զբլ-  
խիցս ռազ անելու նպատակով:

Եւ՝ անցագիրը ծոցազրպանից հանելով, աւե-  
լացրեց.

— Սրանով, ի դէպ, կարող էք իմանալ նաև  
ով լինելա, անուես և այլն և՛ ըստ հարկին, դիմել  
իմ հիւպատոսարանին:

Երկգլխեան արծիւը դրոշմուած տեսնելով ան-  
ցագրի ճակատին, լրտեսի ձեռքերն ու ոտքերը  
թուլացան, այնինչ Զաբէլը հազիւ կարողացաւ զբա-  
ղել ուրախութեան ճիչը և ազատ շունչ առաւ:

Իսկ ինչ վերաբերում էր սպաներին, նրանք



ապշուլթեամբ նայեցին միմիանց և «Մոսկով թա-  
բաղասը իմիջ» (ուուսահայտակէ եղել) ասելով, ըստ  
կարելոյն, մէկիկ-մէկիկ դուրս սողացին կայուտից:

Լրտեսը մնաց մենակ: Մի բոպէ առաջ տի-  
րաբար յոխորտացող և սպառնալիքներ կարգացող  
մարդը, այժմ մուկն էր կտրել: Նա անգագար թեր-  
թում էր անցագիրը, ինքն էլ չիմանալով ինչու,  
որովհետեւ նրանից ոչ մի բառ չէր հասկանում:  
Մի քանի բոպէ անորոշ վիճակի մէջ մնալուց յետոյ,  
ուստիկան գինուորներին հրամայեց դուրս ելնել: Աս-  
տիկանները ինչպէս մեքենայաբար եկել էին, նոյն-  
պէս մեքենայաբար դուրս ելան: Բոլորովին առան-  
ձին մնալով, լրտեսը անցագիրը դարձրեց Արմե-  
նակին և սկսեց ներողութիւն խնդրել, որ իրեն  
անհանգիստ արին: Նա քծնողաբար յարեց, որ սպա-  
ներն իրեն մոլորացրել են, թէ դրանք շատ են  
երես առել, բայց ինքը պիտի աշխատի պատժել  
տալ նրանց հանումներին հասցրած վիրա-  
ւորանքի համար: Աւ շողոքորթիչ ձայնով սկսեց  
բացատրել, թէ որքան ծանր ու փափուկ է իւր  
պաշտօնը, որքան լուրջ ու պատասխանատու: Չը  
մոռացաւ աւելացնել նաև այն, որ իրենք գիշեր  
ու ցերեկ, ձիւն ու անձրևին, անքուն, անգագար  
հսկում են մի կողմից՝ բնակիչների անդորրութեան  
ու ապահովութեան վրայ, միւս կողմից՝ պաշտօ-  
նեաների վարմունքի ու վերաբերմունքի վրայ դէպի

հպատակները, առանց ցեղի, սեռի ու ազգի  
խտրութեան...

Աւ հազիւ լսելի ձայնով ասաց.

— Մի քանի դուրուշ խահուէ փարասի  
չէք տալ խեղճ ուստիկաններին, որոնք իրենց գո-  
լութիւնը պահպանում են բացառապէս առատա-  
ձեռն մարդկանց շնորհած նուէրներով:

— Եւ ոչ իսկ մի փարայ, պատասխանեց Բէկ-  
եանը ձեռքի արհամարական շարժումով, որով-  
հետեւ այժմ էլ նրան բարկութիւնից հանում էին  
լրտեսի ստոր շողոքորթութիւնները:

— Է՛հ, դուք ողջ լինիք, ասաց հաֆիէն  
և խոնարհաբար գլուխ իջեցնելով դուրս գնաց:

IV

Բէօյուկ-Գարէում սպասուող փոթորիկը 42  
թիւ շոգենաւին վրայ հասաւ Բէշիկթաշի մօտ: Նե-  
ղուցն աւելի ևս ալեկոծուել, փրփրել էր, կարծես  
յատակից եռում, եփում լինէր: Մէգի կապարա-  
գոյն թանձր վարագոյրի տակ թաղուած էր ամ-  
բողջ քաղաքը: Քամին շառաչելով գալիս, անցնում  
էր: Գոռում էր երկինքը, գոռում էր ալեկոծուած  
ծովը: Չորս կողմից լսում էր փոթորիկից ցնցուող  
ծառերի ճոնչիւնը և ամեն անգամ, երբ փայլա-  
տակում էր կայծակը, երկնքից թափում էր այն-



պիսի հեղեղ, որպէս թէ ծավը յատակն ի վեր շըրջուած, քաղաքի գլխին թափուելիս լինէր:

Երկու քայլի վրայ ոչինչ չէր երևում: Գրութիւնը ծովի վրայ խիստ վտանգաւոր էր: Շոգեհաւը սուլում էր անդադար բոլոր ոչժով, օգնութիւն կանչող վերաւոր առիւծի նման և նրա զիւ, բեկբեկուող ձայնը միախառնուելով քամու մռնչիւնի, երկնքի զզրզիւնի և ծովի ծափ ու շփոցի հետ, շուրջը տարածում էր երկիւղ ու սարսափ: Արհաւիրքը պատել էր բոլոր ճանապարհորդների սրտերը: Սմենքն էլ սպասում էին այն վայրենի, հսկայ ալիքին, որ մի հարուածով իւր տակը պիտի թաղէր իրենց:

Այդ բոպէին թերևս Բէկեանը միակ մարդն էր, որի վրայ ոչ մի ազդեցութիւն չէր գործում բնութեան արհաւիրքը: Տխուր միջադէպը այնպէս յուզել էր նրան, որ նրա ջղերը դեռ շարունակում էին մնալ նոյն լարուած վիճակի մէջ: Եւ նրա յուզուած բորբոքուած միտքը թափառում էր օսմանեան պետութեան հեռաւոր անկիւններում: Խոնջեր էին կատարում այնտեղ, այդ պետութեան խուլ անկիւններում, ուր օրէնք, իրաւունք ու արդարութիւն ասածներդ երբէք գոյութիւն չէին ունեցել: Նա մինչև այդ օրը լսած և կարդացածները բազդատում էր հենց նոր իւր աչքով տեսածի հետ և դուրս էր բերում տխուր, յուսահա-

տական եզրակացութիւններ: Պատկերացնելով իրեն միլիօնաւոր դժբախտ քրիստոնեաների կրած տառապանքները, տանջանքներն ու քրոնիքական անպատուութիւնները, այն քրիստոնեաների, որոնք ճակատագրի չը դիտես ինչ մի քմահաճ կարգադրութեամբ ընկել էին այդ աւազակ, արիւնարբու և բարբարոս պետութեան ծանր լծի տակ—նրան պաշարում էր խորին յուսահատութիւն...

— Խոնջ բարբարոսութիւններ են տեղի ունենում հեռաւոր գաւառներում, մտածեց նա ջղային մատների մէջ տրորելով լրագիրը:

Փոթորիկը դեռ շարունակուում էր նոյն սաստկութեամբ և շոգեհաւը թեթև տաշեղի նման տատանում էր Բոսֆորի ալիքների վրայ:

Տիկինը կայուտի պատին թինկնած, խփել էր աչքերը, թւում էր թէ նիրհում է:

Իսկ Զաբէլը գաղտագողի նայում էր Բէկեանին, հետևում նրա զիմագծերի արագ փոփոխութիւններին, որոնք ցոլացնում էին նրա հոգեկան վիճակը: Եւ թւում էր նրան, թէ բաց գրքի նման կարդում է այդ երիտասարդի սիրտը, նրա հոգեկան խռովութիւններն ու յուզումները:

— Ես եղայ պատճառը...

Ասաց Զաբէլն իւր մտքում և անցած միջադէպը իւր ամբողջ մանրամասնութեամբ պատկերացաւ նրա աչքին: Բայց այդ երկար չը տեւեց:



հակառակ իւր կամքի, նա կրկին սկսեց մտածել անձանօթ երիտասարդի մասին, որն ինքն իրեն վտանգի ենթարկելով, պաշտպանել էր մի անձանօթ աղջկայ պատիւը:

—Ո՞վ է արդեօք...

Այս հարցն արած ժամանակ նա երկիւղածութեամբ նայեց երիտասարդին: Այդ ժամանակ նա զգաց, որ կրճքի տակ զգում է ինչ-որ մի քաղցր, հեշտալի թրթրում և միևնույն ժամանակ մի անձանօթ մղում դէպի անձանօթ երիտասարդը:

—Այս ի՞նչ է կատարում իմ մէջ...

Կրկնեց Ջաբէլը իւր մտքում, բայց այս հարցի պատասխանի մասին դեռ չը մտածած, շոգենաւը դարկուեց Գարաքէօյի կամուրջին կից նաւամատուցին: Շոգենաւը սաստիկ ցնցուեց, ցնցելով ու պատեպատ դարկելով ճանապարհորդներին:

Բէկեանը կարծես քնից գարթնելով, բարձրացրեց գլուխը:

Տիկինը նույնպէս ցնցուեց և աչքերը բանալով, նախ մի տեսակ տարակուսանքով նայեց շուրջը, ապա մօտեցաւ կայուտի լուսամուտին:

—Փառք Աստծու, անվտանգ հասանք, սոսց նա:

Այդ ժամանակ Ջաբէլը ուղղուեց իւր տեղում, բայց ակամայից հայեացքը կրկին դարձաւ դէպի Բէկեանը: Երկուսի նայուածքները հանդիպեցին միմիանց և երկուսի երակներով էլ անցաւ

մի անձանօթ սարսուռ: Ջաբէլը զգալի կերպով կարմրելով, խոնարհեց գլուխը և անգիտակցաբար սկսեց խաղալ մատանիի հետ: Օրիորդի կարմրութիւնը շփոթեցրեց Արմենակին և շփոթութիւնը թագցնելու մտքով, դուրս հանեց ժամացույցն ու ուղղակի օրիորդին դառնալով ասաց.

— ժամը հինգն է. երկու և մի քառորդ ժամ տեւեց Բէօյուկ-Դարէից այստեղ:

— Շատ դանդաղ անցանք, պատասխանեց Ջաբէլը առանց գլուխը բարձրացնելու:

— Բէօյուկ-Դարէից այստեղ քանի՞ մղոն կըլինի:

— Ճիշտ չը գիտեմ, սակայն Շիրքէթի նոր շոգեհուները, որոնցից մէկն է 42 թ. շոգենաւը, անցնում են երեք քառորդ ժամում, ուղիղ գծով. բայց որովհետև այդ շոգենաւերը մի ժամում տասըն և ութ մղոն են կտրում, այս հաշուով Բէօյուկ-Դարէից այստեղ պէտք է լինի մօտաւորապէս տասն և չորս ծովային մղոն:

— Սակայն այդ հաշիւը լաւ եղանակի հաշիւ է, մէջ մտաւ մայրը կրկին նստելով.— տեսնո՞ւմ էք առևտրական բոլոր շոգենաւերն ու առագաստանաւերը բացառապէս այստեղ են խարխիւ ձգած, այսինքն Ոսկեղջիւրի բերանին, իսկ դրանց միջով անցնել, մանաւանդ երբ եղանակը վատ է, ծովն ալեկոծուած և միգապատ, շատ վտանգաւոր է և անցնում են շատ դանդաղ... Այս էլ պէտք է նկա-



տել, որ Նիրքէթի նաւապետները բացառապէս մահմեդականներ են, որոնք շատ վայրի վերոյ տեղեկութիւն և փորձառութիւն ունեն նաւապարութեան արհեստի վերաբերմամբ...

— Ի՞նչպէս... հապա ինչպէս են ամբողջ մի շոգենաւ հաւատում նրանց:

— Զարմանալու բան չը կայ, նկատեց Զարէլը համարձակօրէն Արմենակի երեսին նայելով. — Ինչպէս որ երեկուայ զինւորն այսօր փաշայ է դառնում և երկրի կառավարութեան դէկն ստանձնում, այնպէս էլ երեկուայ նաւակաւարն այսօր դառնում է նաւապետ և շոգենաւի ճակատագրի հետ միասին խողովմ է և ճանապարհորդների ճակատագրի հետ...

— Տարօրինակ բան է, օրիորդի խօսքն ընդմիջելով բացականչեց Բէկեանը.

— Այո՛, տարօրինակ է, բայց այդ տարօրինակութիւնը թուրքիայում մի տիրապետող սիստեմ է... ոչինչ չը կայ այստեղ, որ հիմնուած չը լինի տարօրինակութեան վրայ, որովհետև թուրքերը հիմնական օրէնք, դիսցիպլինա և այլն չեն ընդունում և չեն կարող տանել...

— Ի՞նչու...

— Արովհետև ոչ մի տեսակ մրցութեան դիմանալ չեն կարող: Եթէ ամեն բանում պահանջուէր մասնագիտական հմտութիւն, թուրքերին կը մնար

կօշիկներ մաքրել միայն:

Բէկեանը լռեց նա տեսաւ, որ օրիորդի կարծիքը շատ ճիշտ է, որ ինքն էլ հենց այդպէս է համոզուած:

Բայց այդ լռութիւնը ընդհատեց օրիորդը հարցնելով.

Ի՞նչէնդի, դուք Կովկասցի էք:

— Այո՛, օրիորդ և լիշեց իւր ծննդավայրի անունը:

— Շատո՞ւց է այստեղ էք:

— Երրորդ օրն է...

— Երրորդ օրը... Եւ քիչ մնաց ծանր փորձանքի պիտի ենթարկուէիք... ահա՛ ձեզ մի անիծեալ երկիր...

— Անիծեալ կառավարութիւն ասա՛, ուղղեց մայրը, երկիրն, ընդհակառակը, շատ օրհնուած է:

Կրկին տիրեց խորին լռութիւն: Արմենակն այդ ժամանակ նայում էր, թէ ինչպէս շոգենաւը յետ ու առաջ լողալով կամաց կամաց մօտենում էր նաւամատուցին և ինչպէս հաստ չուանները ձեռքերին բռնած նաւաստիները, շոգենաւի տախտակորմից դուրս կանգնած, պատրաստուում էին շոգենաւը կապոտել:

Զարէլը, որ նոյնպէս նայում էր նաւամատուցի կողմը, յանկարծ դառնալով ասաց,

— Ի՞նչէնդի, թէ և անծանօթ, բայց դուք



պաշտպանեցիք ինձ. թող տուէք իմ շնորհակալութիւնս . . .

— Խնդրեմ. շնորհակալութեան ոչ մի բառ, ընդմիջեց նրա խօսքը Բէկեանը. — ես իմ պարտքս կատարեցի, օրինորդ, դեռ զգում եմ, որ լիովին չը կատարեցի . . . Ո՞վ էլ լինէր իմ տեղ, լինէր ռուս, ֆրանսիացի, գերմանացի, նոյնիսկ նենգաւոր յոյն, հաւատացած եմ, որ նոյնը կանէր:

— Գուցէ . . . և այն ժամանակ մենք պարտական էինք շնորհակալ լինելու ռուսից, ֆրանսիացուց, գերմանացուց, նոյնիսկ նենգաւոր յոյնից . . . Այդ դեռ լոկ կարծիք է, ենթադրութիւն է . . . այնինչ արդէն կատարուած փաստ է, որ այդ անսխորժ միջադէպին դուք վերջ տուիք:

— Վերջ տուի՛ր . . . տիկնոջ խօսքի վրայ բացականչեց Արմենակը:

Եւ գլուխը խօնարհելով սփին, ինքը իւր հետ խօսող մարդու նման աւելացրեց.

— Այսօր, այն, գուցէ վերջ տրուեցաւ, վերջ տրուեցաւ մեզ հետ և մեր աչքի առաջև կատարուող դէպքին . . . բայց մեզնից մի քիչ հեռու, մի ուրիշ շողենաւի վրայ, քաղաքի մի ուրիշ անկիւնում, պետութեան մի ուրիշ հեռաւոր քաղաքում, գիւղում կամ աւանում միթէ չեն կրկնուում հենց այս վայրկեանիս աւելի խայտառակ դէպքեր: Պաշտօնեաները, մանաւանդ զինուորականները, որոնք անց-

նում են զուտ պետական կրթական բովից, նրանք ամեն մի պետութեան բարոյեականի ջերմաչափներն են ներկայացնում . . . Անկարգ է պաշտօնեան, խախտում է ուրիշի իրաւունքը, վիրաւորում է ուրիշի պատիւը, գողանում, յափշտակում, կոչուտում է— դուք կարող էք ասել, որ այդ պետութիւնը հիմնուած է անօրէնութեան, անարդարութեան և անիրաւութեան վրայ . . . Ուրեմն կարելի է համարձակ ասել, որ այս երկրի մէջ օրէնք, իրաւունք, արդարադատութիւն չը կայ և չի կարելի սպասել . . . Քանի որ գոյութիւն ունի այս պետութիւնը, երկրազնդիս այն մասը, որ աշխարհագրականապէս կոչուում է թուրքիայ, միշտ եղել է և կը լինի անիրաւութիւնների, բարբարոսութիւնների մի ընդարձակ թատերաբեմ, նախատինք բերելով լուսաւորուած մարդկութեան . . .

— Անհատների նման, մարդկութիւնն էլ ունի իւր հիւանդոտ անդամները, բժշկութեան կարօտ կողմերը. ճակատին թափուած գանգուր մտքերը յետ տանելով, շարունակեց Բէկեանը. — այդ հիւանդոտ անդամներից մէկն ու սպառնականը եղել է և է թուրքիան՝ ընդհանրապէս, թուրք կառավարութիւնը՝ մասնաւորապէս: Չի կարելի ասել, թէ Եւրոպան այնքան միամիտ լաւատեսերիցն է, որ համոզուած չէ թէ թուրքիան երբէք կարող չէ բարեկարգուել, կարող չէ առողջանալ . . . Ընդհա-



կառակը... Բայց որպէս անհատների, նույնպէս և պետութիւնների մէջ գոյութիւն ունի քրոնիքական ազահոլութիւն և այդ պետութիւնների ազահոլութեան վրայ հիմնուած շահերը թույլ չեն տալիս միանալու և վճռական անդամահատութեան ենթարկելու, միանգամ ընդ միշտ երկրիս վրայից սրբելու այն նեխած, ապականուած մասը, անդամը, որ կոչուում է թուրքիա և որի նեխած մարմնից բարձրացող ժահահոտութիւնը ծածկում է քրիստոնէական խնկի անուշահոտութիւնը...

Բէկեանը այնպէս էր ոգևորուել, որ ամենեւին չէր մտածում թէ այն նիւթը, որի մասին խօսում է ինքը հասկանալի, մարտելի կամ հաճելի է լըսողներին: Նա խօսելու պահանջ էր զգում և այն ոչ թէ լսել տալու համար, այլ իւր մտքերի հեղեղով իւր ներքին ամբոխմունքը դատարեցնելու, խեղտելու մտքով: Եւ տեղի վրայ ուղղուելով աւելացրեց.

— Քրիստոնէութիւնը քաղաքակրթութեան զարգացման գլխաւոր ֆակտորներից մէկն է հանդիսացել: Բայց չը գիտեմ ինչու, քրիստոնէութեան բերած քաղաքակրթութիւնը մինչև այսօր փայլել է իւր միակողմանիութեամբ, նրա կշիռքի նժարի մի ծայրը այնքան վեր է եղել, որքան միւսը վայր: Օրինակ. Քրիստոնէութիւնը մի որոշ ժամանակաշրջանում պատրաստում էր զուտ ոգիներ, խեղտելով մտքի շարժումներն ու թռիչքները. իսկ

այսօր մարդկային միտքը հասած է զարմանալի կատարելութեան, նա հասնում է մինչև երկնային մարմինները և երկրի խորքերը, այնինչ հոգին դատարկ է, դատարկ: Քանի որ չը կայ մտքի և հոգոյ զարգացման մէջ հաւասարակշռութիւն, արդարագատութիւն, անկեղծութիւն կարող չէ լինել... Ես կարող եմ լականէ լանուանէ լիշել բարձր քաղաքակրթութեան հասած այնպիսի պետութիւններ, որոնք թուրքից ոչ պակաս բարբարոսաբար հալածում են իրենց օտարադաւան քրիստոնէայ հպատակներին... Ամենից ծիծաղելին այն է, որ այդ հալածանքն անում են լանուանէ քրիստոնէութեան, լանուանէ քաղաքակրթութեան: Ինչո՞վ բացատրել եղուխտների և պաստէօրների տենդային գործունէութիւնը հայերի մէջ, իսկ կաթոլիկ և բողոքական պետութիւնների ցոյց տուած հզօր պաշտպանութիւնը այդ մարդորսներին... Իսկ այնտեղ, իրենց կողքին, իրենց քթի տակ ոչ-քրիստոնէայ մի ազգ, քաղաքակրթութեան ոչ մի նշույլ ցոյց չը տուող մահմեդականութիւնը սիստեմատիքաբար ջնջում է մի ամբողջ քրիստոնէայ ազգ... Ո՛հ, այս նիւթի մասին խօսելն անգամ լուսահատութիւն է բերում մարդուս, որովհետև ես շատ լաւ գիտեմ, թէ քաղաքակրթութեան և մարդասիրութեան անունով լոխորտացող մեծ պետութիւնները ինչու աչք են խփում թուրքիայի նկատմամբ, ինչու ձեռք չեն



մեկնում իրենց ճակատից սրբելու թուրքիայ կո-  
չումա՞ծ ամօթալի կնիքը...

— Թերևս ժամանակը դեռ հասած չէ, դեռ  
պիտի քաւենք մեր անմիաբանութեան մէջ ունե-  
ցած լանցանքը, պիտի վայելենք նրա բերած դառն  
պտուղը, նկատեց տիկինը:

Չարէլը ոչինչ չը խօսեց, նա ամբողջ ժամա-  
նակ նայում էր Արմենակին և նրա նայուածքի մէջ  
կար յափշտակութիւնից ու հիացմունքից աւելի մեծ  
բան:

Տիկնոջ արած նկատողութեան վրայ, Բէկեանը  
ձեռքի մի յուսահատական շարժում արեց, ասլա  
ձեռքն առաւ «Le petit journal»-ը:

Այդ ժամանակ շոգենաւը երկրորդ անգամ  
զարկուեց նաւամատոյցին, երբ բազմութիւնը ան-  
կարգ կերպով սկսեց դուրս խուժել դէպի կամուրջը:

Տիկինը վերելաւ, նոյնը պատուիրելով և Չա-  
բէլին: Արմենակը արդէն պատրաստ էր և կըր-  
թուած երիտասարդի շնորհալիութեամբ, նա դուռը  
բաց արեց, երբ տիկինը ուզեց դուրս գնալ: Օրիոր-  
դը նոյնպէս հետևեց մօրը, բայց դեռ դուրս չե-  
լած, ձեռքը մեկնեց Բէկեանին և սասց.

— Ծնորհակալ եմ...

Արմենակը շտապեց սեղմել նրա ձեռքը, բայց  
չը կարողացաւ պատասխանել. ինչպէս ասած, լեզուն  
կպաւ: Նրան թւաց թէ իւր առաջև կանգնած է

էլէքտրականութեամբ յագեցած մի տարր, թէ  
էլէքտրական ուժեղ հոսանքը ձեռքի միջոցով անց-  
նում է իւր մէջ, վազում երակների միջով և ցըն-  
ցում է իւր սիրտը, հոգին, էլէքտրականացնում է  
իւր ուղեղը, ամբողջ էութիւնը: Ու նայում էր նրա  
կեանքի կրակով վառուող աչքերին. նայում էր խո-  
րին յափշտակութեամբ, որպէս թէ առաջին ան-  
գամն էր հանդիպում նրան:

Վերջապէս պատասխանեց.

— Չարժէ, օրիորդ...

Այդ ժամանակ մայրը, որ մի երկու քայլ առաջ  
էր գնացել, կրկին լետ դարձաւ:

Չարէլը աւելացրեց ժպտելով.

— Մի՞թէ այս մեր առաջին և վերջին հանդի-  
պումը պէտքէ լինի:

— ձանապարհորդութեան մէջ շատերն են  
դիպուածով հանդիպում միմիանց... Պատահում է,  
որ այդ հանդիպումը դառնում է սկիզբն տևական  
բարեկամութեան. պատահում է և դրա հակառակը,  
այսինքն և՛ սկիզբն և՛ վերջը, նայելով թէ հանդի-  
պողները ինչպիսի տպաւորութիւն են թողնում  
իրար վրայ... Իսկ եթէ հաճելի է ձեզ, օրիորդ, որ  
մեր հանդիպումը, այն էլ դիպուածոյ տխուր հան-  
դիպումը վերջինը չը լինի, համարձակուում եմ խոս-  
տովանելու, որ այդ նաև իմ փափազն է... Այս օր-  
ուսան օրը ես երբէք չեմ կարող մոռանալ, որով-



հետև նա իմ աչքին բաց արեց երկու նոր աշխարհ...  
Արմենակը լուզումից դողացող ձայնով աւելացրեց.

— Այո՛, երկու նոր աշխարհ, մէկը—լի կեանքով ու քաղցրութեամբ, միւսը—լի արիւն ու արցունքով...  
Ու այցետոմսը նրան մեկնելով, ասաց.

— Բնակուում եմ Hotel Bristol-ում, ուր ժամանակաւոր հիւր եմ:

— Ժամանակաւոր հիւր, հարցրեց տիկինը աւելի մօտենալով:

— Այո՛... մի քանի օրից կը մեկնեմ դէպի Պարիզ:

— Ուրեմն պէտքէ խնդրեմ, որ վաղը մեզ մօտ ճաշելու պատիւն անէք, աշխուժով վրաբերեց տիկինը, աւելացնելով, որ ինքը Կովկասցի հայերի մասին միշտ լաւ գաղափար է ունեցել, որ այդ գաղափարը ներշնչել է իրեն ամուսինը, թէ նա էլ, այսինքն ամուսինը, շատ կուրախանայ...  
— Ուրախութեամբ, տիկին. մերժելու ոչ մի պատճառ չունեմ, իսկ ուրախութեամբ ընդունելու շատ պատճառներ:

— Ու նայեց օրիորդին:

— Զարեյը շփոթուեց ու կարմրեց և մօր նալուածքից խոյս տալու մտքով դարձրեց երեսը, որ պէս թէ ինչ-որ փնտրում է:

— Ուրեմն խոստացէք ժամը ճիշտ տասներկուսին հիւրանոցում գտնուել, որոշեալ ժամին մեր կառքը կը գալ ձեզ մեր տունը առաջնորդելու... Որպէս քաղաքին անծանօթ օտարական մեր տունը գտնել դժուար է:

— Խոստանում եմ, տիկին, ասաց և սեղմեց նրա ձեռքը:

Ապա դարձաւ Զարեյին.

— Յը տեսութիւն, օրիորդ...

Զարեյը ձեռքը մեկնեց, հաղիւ լսելի ձայնով պատասխանեց նրան, բայց չը համարձակուեց գրլուխը վեր բարձրացնել:

Նրանք բաժանուեցին:

V.

Միւս օրը Օդեսանների սեփական կառքը Արմենակին տարաւ խոստացած տունը: Տան հայրը՝ Գուրգէն էֆ. Օդեսանը, որ լիսուն տարու մօտ մարդ էր, այդ օրը լատկապէս տանն էր մնացել Կովկասցի հիւրին ընդունելու համար: Եւ նա առաջին անգամ ինքը դիմաւորեց նրան ասելով.

— Ես սիրում եմ Կովկասցիներին, նրանց մէջ կեանք կայ, հոգի կայ...

Եւ թեքը մտնելով առաջնորդեց ընդունարանը:

— Միթէ նոյն կեանքը, նոյն հոգին պակա-



սում է թրքահայերի մէջ, ժպտալով հարցրեց Արմենակը:

— Ահագիւն տարբերութիւն կայ այդ երկու ժողովուրդներին մէջ... և այդ տարբերութիւնն առաջացնողը միջավայրն է, տիրապետող մթնոլորտը... Ի՞նչ կարող ենք դառնալ թուրքի ձեռքում, թուրքինոյ նեխած մթնոլորտում... Նրա տիրապետութիւնը թունաւորում է մեզ... Նա կանգնել է մահամերձ և երեսը դարձրել դէպի խաւարը, դէպի գերեզման, դէպի կորստեան անդունդը... Նա փախչում է լոյսից—մեզ էլ իւր ետևից քարշ է տալիս դէպի նոյն խաւարը, նոյն կորստեան անդունդը, ուր՝ վերջապէս, պիտի թաղուի ինքը...

— Այդ ճիշտ է, վայրկեանական տիրութեամբ նկատեց Բէկեանը:

Այդ ժամանակ ներս մտաւ տանտիկինը իւր աղջկայ և որդու հետ:

Գուրգէն էֆ. Բէկեանի ուշադրութիւնը դարձնելով դէպի նրանց, ասաց.

— Ահա կինս, Մարի Օդեան, որի հետ ծանօթ էք... այս էլ միակ աղջիկս է, Զարէլը, որի հետ նոյնպէս ծանօթ էք... Որքան էլ տխուր և անպատուաբեր եղած լինէր երեկուայ միջադէպը, այնուամենայնիւ մենք հենց այդ միջադէպին ենք պարտական, որ այսօր ձեզ մեր հիւրը տեսնելու պատիւն ունենք... Այդ առթիւ շատ ուրախ եմ...

Կովկասցիքդ մեզ հոսսու էք կոչում, սակայն չը կարծէք, թէ իմ այս ընդհանուր ունեցած զգացումներս կեղծ են: Նա խորշում եմ կեղծ, պատեր բաներից...

— Բայց մոռացաք ինձ էֆէնդուն ներկայացնել, հայր...

— Ա՛խ, այն, մոռացայ. սա էլ իմ միակ որդին է, Բաբկէնը, տարիքով քսաներկու—քսաներեք, թէև արդէն ոտքէ դրել ժամանակակից գրագէտների շրջանը:

Բէկեանը մի շարժում արեց, որով Գուրգէն էֆ. ձեռքի համապատասխան շարժումով նկատեց.

— Գուցէ դուք պատրաստուում էք շնորհաւորել ինձ... խնդրեմ, թողէք այդ միտքը. ծանրագլուխ երիտասարդների կատարեալ սով է Պոլսում: Բառախաղները հռչակում են—խորիմաստ գրագէտներ, զառանցանքները՝ փիլիսոփայութիւն... Դա մեր ամենամեծ և անբուժելի հիւանդութիւնն է:

Այնուամենայնիւ Բէկեանը շատ սիրալիր կերպով սեղմեց Բաբկէնի ձեռքը, որ իւր հագուստի մաքրութեամբ ու շնորհալիութեամբ, իւր գլխի սանրուածքով, շարժումով և այլն ներկայացնում էր որպէս մի կատարեալ ջենտելմէն:

— Հայրս ինձ բաւական լաւ ներկայացրեց ձեզ, ասաց Բաբկէնը հեզներով:

— Հայրական կատակներ են, որոնցից կարելի



չէ նեղանալ. ինչպէս տեսնում եմ, ձեր հայրը սիրում է կատակներ անել և ենթադրում եմ, որ մօտիկ բարեկամ պէտքէ լինի ձեր հօգտակաւոր երկիծարան Պարոնեանին . . .

— Իզուր էք ասածս սխալ թարգմանում, աշխոյժով փաստաբանեց Գուրգէն էֆէնդին. — Իրաւ որ Պարոնեանը անձնական բարեկամս է, բայց ասածս կատակ չէր: Միայն դրանով ես որդուս չեմ մեղադրում. նա ժամանակի ծնունդ է, այն ժամանակի, երբ հաւերը երկաթի հաւկիթներ են դնում. . . Եւ այդ ահագին նշանակութիւն և ազդեցութիւն ունի. . . մեր ժամանակը «տասն չափեր, մէկ կտրեր»-ի ժամանակ էր, այնինչ այժմ կտրելուց յետոյ են չափում. — այս է մեր և իրենց մէջ եղած տարբերութիւնը:

— Եւ աչքի զարկող ու անհամեմատ մեծ տարբերութիւն է, այնպէս չէ, պ. Բէկեան:

— Վկայի պէտք չկայ, վրաբերեց Գուրգէն էֆ. — այդ ես ինքս խոստովանում եմ և այդ տարբերութիւնը կայանում է նրա մէջ, որ մենք մինչև մի բան էինք շինում, տասնեակ տարիներ էր անցնում, այնինչ այժմ շինում են կարճ ժամանակամիջոցում . . .

— Հայրս քառուսն են պիտի ասէր, բայց խնայեց, նկատեց օրիորդը ժպտալով:

— Կեցցէս, աղջիկս, լաւ գտար, զարմանալի

մտազէտ ես, եթէ կարելի է այդ բառը դործածել:

Այնուհետև խօսքը դարձաւ երեկուայ փոթորկին և շոգենաւում տեղի ունեցած միջադէպին: Բարկէնը հաղորդեց, որ կայծակ է ընկել մինարէթներից մէկի վրայ, իսկ տ. Օդեանը աւելացրեց, որ Գաղբէօյի և Հայդարփաշայի մէջտեղ փոթորիկը մի ահագին ծառ է տապալել: Այս բոլորի առթիւ Գուրգէն էֆ. մի մի զաւեշտական նկատողութիւն արեց, մինչև որ յայտնեցին, թէ ճաշի սեղանը պատրաստ է:

Գուրգէն էֆէնդին Արմենակի թւեր մտնելով, առաջնորդեց ճաշասրահը, ուր սեղանի վրայ տեղի ունեցած զրոյցների շնորհիւ, ճաշը շատ զուարճալի անցաւ: Բէկեանը պատմեց թէ Կովկասեան և թէ ուսանողական կեանքից զանազան նորութիւններ, պատմեց նաև թէ ինչպէս հարուստ ուսանողները յաճախում են համալսարան ոչ թէ գիտութիւններ սովորելու, այլ այդ պատրուակով միշտ հեռու մնալու ծնողների աչքից, անսանձ հաճոյքներին բաւականութիւն տալու համար. իսկ սրա հակառակ, թէ ինչպէս աղքատ ուսանողները գոհացուցիչ տարրական պէտքերից անգամ մեծ մասամբ զուրկ լինելով հանդերձ, այնուամենայնիւ ձգտում են հասնել իրենց բարձրագոյն նպատակին: Ապա խօսքը դարձաւ իւր վրայ: Բէկեանը պատմեց իւր կեանքից մի քանի նշանաւոր դէպքեր. ասաց,



Թէ ինքը հօր երեսը չի տեսել. թէ հայրը վախճանուել է իւր աշխարհ գալուց շատ առաջ, իսկ մայրը, այդ ծանր կորուստը տանել չը կարողանալով, թողել ու տեղափոխուել է ուրիշ քաղաք:

— Զը գիտեմ, թէ մայրս ինչպէս էր կարողանում իւր մատները աշխատութեամբ պահպանել իմ և իւր գոյութիւնը, — աւելացրեց Արմենակը, — սակայն երբ ես եօթ թէ ութ տարեկան էի, անշուստ կերպով մի ժառանգութիւն ստացանք, թէև այդ առասպելական կտակի մասին մայրս ինքն էլ որոշ ոչինչ չը գիտէր...

— Մեծ էր արդեօք այդ գումարը, հետաքրքրութեամբ հարցրեց Գուրգէն էֆէնդին:

— Ես կտակած գումարի քանակութեան մասին ոչինչ չեմ կարո ղասել. որովհետև այն ժամանակ շատ փոքր էի, բայց գիտեմ, որ մայրս այդ գումարի մի շատ չնչին մասն է վերցրել, իսկ մնացածը նուիրել է բարեգործական նպատակների, որոնց մասին չի սիրում խօսել... Զի սիրում խօսել նաև հօրս մասին, որովհետև, լոկ նրա մի լիշատակը բաւական է, որ օրերով տխրի, տառապի:

Արմենակը մի փոքր շունչ առնելուց լետույ, առանձին պարծենկոտութեամբ շեշտեց.

— Այո բոլորից լետույ պէտքէ ասեմ, որ մայրս գերբնական աշխատութիւն է գործ դրել իմ դաս-

տիարակութեան ու կրթութեան վրայ:

— Կարծեմ ասացիք, որ Պարիզ էք գնում, հարցրեց Գուրգէն էֆ.

— Այո, գիմնագիտան աւարտելուց լետույ, մօրս հետ գնացինք Մոսկուայ, ուր մտայ համալսարան, բայց նոր փոխուել էի երրորդ կուրսը, երբ պատահեց այնտեղ մի դէպք, որն անկարելի դարձրեց ինձ մասնագիտութիւնս շարունակելու: Ստիպուած եղայ թողնելու և այժմ մտադիր եմ շարունակելու Պարիզում:

— Ցաւալի է, կրկնեց Գուրգէն էֆ. մի առանձին մտազբաղութեամբ և զննելով Արմենակի դիմագծերը, որ շատ նման էր թէ իրենին և թէ Զարէլի դիմագծերին, աւելացրեց.

— Ուրեմն բաղդ չէք ունեցել ձեր հօր երեսը տեսնելու:

— Ոչ էլ նա բաղդ է ունեցել իմ տեսնելու... սակայն մայրս ինձ համար եղել է ամեն ինչ:

— Ի՞նչպէս է կոչուում ձեր տիկին մայրը:

— Աննա...

Գուրգէն էֆ. դէմքի տխրութիւնը մասամբ փարատուեց, բայց երևում էր, որ նրա սրտում թագնուած էր ինչ-որ հեռաւոր լիշատակի զգացում, որ երբեմն զարթնելով, տանջում էր նրան: Արմենակի արած պատմութիւնը զարթեցրել էր հենց այդ լիշատակը, սակայն օտարերկրացի հիւրի



առաջև տխուր չեքեքելու համար, աշխատում էր խեղդել իւր մէջ անցեալին վերաբերող լիշողութիւնները: Այդ պատճառով էլ ճաշը վերջացնելուց յետոյ, երբ մտան դահլիճ թրքական սուրճ խմելու, նա դարձաւ աղջկան.

— Զարէլ, դու այսօր մի տեսակ ես երևում, կարծես չես ուզում մասնակցել մեր թանկագին հիւրին զբաղուեցնելու գործին . . .

— Ես չուզեցի ձեր հետաքրքիր զրոյցն ընդհատել, հայր, պատասխանեց օրիորդը աշխուժով:

— Ծնորհակալ եմք . . . և խնդրում եմք, որ դաշնամուրիդ վարագոյրը բանալով, մի փոքր խօսեցնել տաս:

Զարէլը շառագունելով անցաւ դաշնամուրի առաջ: Մի վալրկեան տան մէջ տիրեց խոր, անթափանց լուսթիւն: Լսում էր միայն վճիտ ապակուն զարկուող ճանճի բզզոցը և նախասենեակի պատից քարշ արած ժամացոյցի միակերպ թիկ թակը: Ամենքն էլ նայում էին օրիորդին, որ նօտայի գիրքն էր թերթում: Արմենակին թւում էր թէ դաշնամուրի առաջև նստածը ճարտար արձանագործի ձեռքով կերտուած մի հրաշալի կիսարձան է: Վերջապէս օրիորդը բարձրացրեց ձեռքերը. դալար մատները սահեցին ստեղուներին վրայով և լուսթիւնը վրդովուեց նախ ցածից դէպի բարձր և ապա բարձրից դէպի ցած ալիքի նը-

ման ողորկ և եթերքի նման թրթրուն ձայնով: Մի քանի բեկբեկուող, բայց քաղցր տրնկ-տրնկոց ևս և կրկին թագաւորեց նոյն լուսթիւնը: Արմենակի երակներով անցաւ մի խտրեցուցիչ սարսուռ, իսկ ականջներում դեռ հնչում էր դաշնամուրի լարերի քաղցր հնչիւնը: Բայց այս անգամ լուսթիւնը շատ կարճ տևեց, դաշնամուրը կրկին որոտաց և որոտման արձագանքը դեռ չը մարած, նա աստիճանաբար ցածացաւ, իջաւ վար, շատ վար, մինչև որ նուազեց նրա լարերի մէջ, իւր ետև թողնելով միայն մի շատ անուշ գիծ, որ շատ նման էր քաղցր լիշողութեան: Ապա՝ նա նուազեց Բեթհովենի մեղեդիներից մէկը այնքան տխուր, այնքան մեղամաղձոտ, որ կարծես թէ անշունչ լարերը արտասուում լինէին:

Արմենակն ինքն իրեն կորցրել էր. նրա ականջին հասնում էր լարերի հնչիւնը, նա տեսնում էր օրիորդի մատների պարը ստեղուներին վրայ, բայց յափշտակուած էր իրեն անձանօթ մի հեշտալի զգացմունքով:

Մեղեդիից յետոյ օրիորդը նուազեց նաև մի քանի եւրոպական պարեր, ապա ասիական եղանակներ. բայց երբ սկսեց Համիդիէ քայլերգի նախերգանքը, Գուրգէն էֆ. վերթուաւ տեղից,

— Թո՛ղ այդ, Զարէլ, այդ քայլերգը ոչ մի հայի դաշնամուր և հայ տան չը պիտի նուագուի,



ասաց նա:

Օրիորդը հնազանդեց: Նա մի փոքր շունչ առնելուց լետույ, եղբօր հետ մի քանի անլսելի խօսքեր փոխանակեց: Բարկէնը մօտեցաւ դաշնամուրին: Զարէլը նուագեց մի բոլորովին նոր, Բէկեանին անձանօթ եղանակ, երբ Բարկէնն էլ երգեց.

«Երբ որ մայրը երկունքով

Աշխարհ բերէ երեխայ,

հայրը նրան մի սրած

Գաշոյն պիտի տայ ընծայ»...

Այդ եղանակի ու երգի թողած տպաւորութիւնը Արմենակի վրայ աւելի քան զօրեղ էր, այնպէս որ երբ օրիորդը վերջացրեց, նա սկսեց սգեորուած ծափահարել:

Զարէլի վարդազոյն թշերն աւելի ևս կտրմբրեցին և նա իւր ներքին ամբոխմունքը ծածկելու մտքով ասաց.

— Ես չափազանց սիրում եմ այս երգը, որովհետև նա սրտիս շատ մօտիկ է... Եթէ հայ-հայրերն ու հայ-մայրերն այս հոգով կրթած, մեծացրած լինէին իրենց որդոց, հաւատացած եմ, որ շատ բան այնպէս չէր դառնայ, որպէս դառնում է այժմ. օրինակ թուրք սպաները չէին համարձակուիլ հայի անունը նախատինքով արտասանելու և հայ կնոջ պատիւն արտաւորելու այնքան անպատիժ կերպով: Զէնքը ոյժ է, իսկ ոյժը՝ իրա-

ւունք:

— Այդ մասամբ միայն ճիշտ է, նկատեց Գուրգէն էֆ. և աւելացրեց. — սակայն միմիայն բարոյական կրթութիւնն է, որ հասցնում է մարդուն իւր կոչման բարձրութեանը, որ հասցնում է ինքնաճանաչութեան, ինքնապաշտպանութեան... Նա գտարւմ է մարդու կրքերը և զարթեցնում է քնած զգացումները... նա սովորեցնում է՝ թէ երբ, ո՞ր դիպուածում պէտքէ սուր հանել կամ երբ պատեանը դնել... Աւագակները գիշեր ու ցերեկ սուր են կրում, բայց չարիքից բացի մարդկութեան որևէ բարիք հասցրած չեն... Զէ որ սուր էին կրում ձեզ շոգենաւում անպատուող սպաները, սակայն քանի՞ փարայ արժէին նրանց սրերը... Իսկ ինչ վերաբերում է այն բանին, թէ զէնքը ոյժ է, իսկ ոյժն իրաւունք—այդ արդէն հին երգ է...

— Հին երգ է, հայր, այժմ արդեօք նոյնը չէ...

— Ո՛չ... Եթէ այդպէս լինէր, եթէ տիրապետողը լինէր զէնքը և ոյժը, այն ժամանակ զինուած ուժեղները միմիանց կոտորելով, կը ջնջուէին, մնալով մի կամ մի քանի ուժեղներ միայն:

— Իսկ դուք, պ. Բէկեան, դուք ինչ կարծիք ունիք այս հարցի մասին, հարցրեց Զարէլը:

— Ես համաձայն եմ ձեզ հետ, որ զէնքն ոյժ է, իսկ ոյժն՝ իրաւունք և թէ այդ բացարձակ իրաւունքով այժմ ապրում են մի կամ մի քանիսը մի-



այն, այնինչ մնացածները զինաթափ եղած գերի-  
ներ են, որոնք ապրում են ուժեղների համար:

— Հասկանում եմ ձեր ասածը. ասաց Գուրգէն  
էֆէնդին տեղից ելնելով:

— Իսկ աւելի հասկանալի դարձնելու համար  
կաւելացնեմ, որ ամեն մի պետութեան մէջ մի կամ  
մի քանի հոգի են ապրում, մնացածները միմիայն  
շնչում են:

Այս ասելով վեր ելաւ և Արմենակը:

— Պատրաստուում էք գնալո՞ւ, հարցրեց օրի-  
որդը:

— Ձեր հայրը նոյնպէս պատրաստուում է գը-  
նալու:

— Ա՛խ, իմ բանն ուրիշ է. ես գործի մարդ  
եմ, իսկ դուք ազատ... Չաբէլ, ինչպէս չեմ սի-  
րում քո այդ հարիմական բնաւորութիւնը... Ա՛ռ  
պ. Բէկեանին և իջէք պարտէզ. այնտեղ գով է և  
օդը թարմ: Ինձ պէտքէ ներէք, որ՝ հակառակ ցան-  
կութեանս, չեմ կարող մասնակցել ձեր զբօսանքին.  
Ինձ մի տեղ սպասում են: Եղանակը խիստ շոգ է  
այսօր, պ. Բէկեան, ձեզ խորհուրդ կըտայի հետևել  
Չաբէլին, աւելացնելով, որ քանի այստեղ էք, որ-  
քան յաճախ գաք մեզ մօտ, այնքան մեծ պատիւ  
օրած կը լինէք և այնքան մեծ հաճութեամբ պատ-  
ճառած:

— Իսկ կիրակի օրը անպատճառ պիտի գնանք

Բէօյուկ-Ռարէ, մէջ մտաւ Չաբէլը:

— Անպատճառ. և այդ հարցն արդէն վճռ-  
ուած է:

Ու կրկին ներողութիւն խնդրելով, դուրս ելաւ:  
Հօր ետևից դուրս գնաց և Բաբկէնը:

VI

Ապարանքի առաջև, դէպի Արևելք, բացուում  
էր մի ընդարձակ պարտէզ, որը վերջանում էր Բոս-  
ֆորին նայող մի քարափով, մօտ լիսուն մետր վեր  
ջրի մակերևույթից: Այնտեղից դէպի յետ, տարած-  
ւում էր քաղաքը—Պէրա, Բանկալիթի, մինչև Ոսկեղ-  
ջիւրի աջ ափի վրայ գտնուող քաղաքամասերը.  
դէպի աջ՝ մինչև սև ծովի ափերը գրկող թէ ասի-  
ական և թէ եւրոպական լեռների անտառախիտ  
ալիքները. դէպի ձախ՝ պատմական Բիւզանդիոնը,  
տեղաւորուած Ոսկեղջիւրը, Բոսֆորը և Մարմա-  
րականը միմիանց հետ խառնուող կորանկիւնի վը-  
րայ, իւր բազմաթիւ մինարէթներով. իսկ առաջե-  
ւից՝ ասիական Կ. Պօլսոյ մի մասը, իւր արուար-  
ձաններով—Սկիւտարը, Հայդարփաշան Գադըքէ-  
օյը, Իշխանական կղզիների շարքը, իսկ սրանց յետև  
Բուրսայի լեռնաշղթան, թաղուած մի տեսակ բաց  
մոխրագոյն մշուշի տակ:

Տեսա՞նք Տրաշալի էր: Կեանքը եռում էր:



Աշխատաւոր մըջիւններին նման նեղուցը աջ ու ձախ  
ակոսում էին հսկայական շոգեհաւերը, հարիւրա-  
ւոր մեծ ու փոքր առագաստանաւեր և հագարա-  
ւոր նաւակները:

Պարտիզի ոտքերի տակ, Բոսֆորի եւրոպական  
ափին, երևում էին Գօլմա-Բախչէի, Ջրադանի և  
Բէշիկթաշի մարմարեայ պալատները, զանազան  
խոշոր ապարանքներ, դեղնագոյն զօրանոցներ և  
մզկիթները, իրենց սրածայր բարձր մինարէթնե-  
րով, բոլորն էլ շրջապատուած կանաչ ծառերով  
և քողաւորուած Բոսֆորի թափանցիկ գոլորշիով:

— Սուլթանները մօլութիւն ունին պալատ-  
ներ կառուցանելու, — ասաց Ջաբէլը, երբ նրանք  
մօտեցան քարափի բերանին ընկած ցանկապա-  
տին. — Իւրաքանչիւր մի սուլթան իւր համար ա-  
ռանձին պալատ է կառուցանում:

— Համիդը նոյնպէս նոր է կառուցել:

— Այո... նա այստեղից մօտ է, մի քիչ ձախ,  
Բէշիկթաշի բարձունքի վրայ... Ես չեմ տեսել,  
բայց պատմում են, որ նա թէև իւր ճոխ ճար-  
տարապետութեամբ չի կարող պարծենալ, բայց  
աւելի շատ փող է նստել:

— Իսկ սիւքեր են նստում այդ պալատների մէջ:

— Շատերը դատարկ են, մի քանիսի մէջ էլ  
մեռած սուլթանների կանայք են փակուած:

— Ջարմանալի կեանք է.

— Անխորհուրդ, զուտ անասնական կեանք,  
աւելացրեց Ջաբէլը:

Նրանք մտան պարտիզի խորքը. ամեն տեղ  
փայլում էր կարգ ու մաքրութիւն: Նեղ և ոլոր-  
պլտոյտ ծառուղիների երկու եզերքում բացուած  
էին եղանակի յարմար զանազան գոյնի ծաղիկներ:  
Նրանք զանազան կողմից գալով, միանում էին  
կենդրոնում, մի բոլորակ ու հարթ տարածու-  
թեան վրայ, յատակը ծածկուած կարմիր աղիւսի  
աւազով: Այդ տարածութեան մէջտեղում շինուած  
էր մարմարեայ մի աւագան, որի մէջտեղից միշտ  
վեր էր զարկում ականակիտ ջրի շաղրուանը և  
անձրեւի կաթիլների նման թափուած էր ցած, վըր-  
դովելով ջրի խաղաղ մակերևոյթը, ուր լողում է-  
ին բազմաթիւ ոսկի ձկնիկներ:

Նրանք նստեցին աւագանի շուրջը դրուած  
նստարաններից մէկի վրայ, ծառի ստուերի տակ:  
Այդ միայնութիւնը, այդ առանձնութիւնը երկու-  
սի սրտին էլ մօտիկ էր: Գուցէ սրտով էլ փափա-  
կած լինէին այդ հանդիսաւոր ըուպէին և մտածած,  
թէ ինչ պիտի ասեն միմիանց, ինչպիսի բառերով,  
որոնք կարողանալին փոխադարձ զգացումների  
թարգման հանդիսանալ: Բայց այժմ, երբ վրայ էր  
հասել այդ փափակելի ըուպէն. նրանց զրոյցը այն-  
քան անկապ էր անցնում, որ իւրաքանչիւրը նը-  
րանցից իրեն էր վերագրում այդ անյաջողութիւնը:



Այդ բանը կատարեցնում էր մանաւանդ Ջաբէլին: Նա չէր ուզում ակամայ արդարացրած լինել հօր կարծիքը, չէր ուզում հարեմական երեւալ, որպիսին չէր իսկապէս. բայց բնական ամօթխածութիւնը, — որ միւսնոյն ժամանակ կազմում էր նրա ազգային յատկանիշներից մէկը, — և դէպի Արմենակը ունեցած բուռն համակրանքը, մի տեսակ կաշկանդում էին նրան: Նա ուզում էր խօսել, զբաղեցնել հիւրին և խօսում էր եղանակի գեղեցկութեան մասին, շրջապատող տեսարանների և նրանց պատմական նշանակութեան մասին... Նրա խօսքերն իսկապէս քաղցր տպաւորութիւն էին թողնում Արմենակի վրայ և թւում էր թէ իւր ականջի տակ լսում է դեղձանիկի դայլայլիկը: Սակայն օրիորդը գոհ չէր. համոզուած լինելով, որ ինքը իւր զրոյցներով իւր երեխայութիւնն է միայն ցոյց տալիս:

Նոյնը մտածում էր և՛ Արմենակը ու հետևելով ինչ-որ փիլիսոփայի խորհրդին, աւելի լսում էր, քան խօսում, որովհետև լսողը աւելի ազատ է ծաղրելի լինելուց, քան խօսողը:

Օրիորդը լանկարծ ընդհատելով մի խօսակցութիւն, որ՝ իւր կարծիքով, զբաղեցուցիչ չէր, վերթուաւ, մի հատ ծաղիկ պոկեց և Արմենակին դառնալով, հարցրեց.

— Ձեր Կովկասումն էլ բուսնում են այսպի-

սի սիրուն ծաղիկներ:

Ու ծաղիկը տուեց նրան:

Արմենակն առաւ, նայեց, հոտ քաշեց և պատասխանեց.

— Կովկասում ծաղիկներ շատ կան, օրիորդ:

— Եւ այսպէս սիրուն... .

— Աւելի սիրուն, քան այս ծաղիկը:

Օրիորդը մի րոպէ ընկաւ մտածութեան մէջ: Արմենակին թւաց, թէ նա վշտացաւ, որ Կովկասում աւելի սիրուն ծաղիկներ կան:

— Եւ գուցէ աւելի սիրուն աղջիկներ... մըտածեց օրիորդը և դարձաւ Արմենակին.

— Այո՛, հայրս եղել է Կովկասում և շատ է գովում, բայց իւրաքանչիւր մի բոյս իւր յատուկ կլիման ունի:

— Իհարկէ ամեն մի կլիմայ իւր յատուկ բոյսն ունի, ուղղեց Արմենակը:

Օրիորդը դարձեալ մտածեց, ապա հարցրեց:

— ձիշտ այս ծաղիկեց չը կա՞յ Կովկասում:

— Գուցէ կայ, բայց չեմ պատահել:

— Եթէ լինի էլ, թերևս ուրիշ անուն ունենայ, օրինակ հենց այստեղ հայերէն ուրիշ է, թուրքերէն՝ ուրիշ... . բայց թուրքերէնը աւելի խորհրդաւոր է... Գուք սրա անունը չը գիտէք...

— Ո՛չ, օրիորդ...

— Ափսոս...



Արմենակի մէջ մի տեսակ հետաքրքրութիւն  
զարթնեց:

Օրիորդը կրկնեց.

— Ափսոս որ չը գիտէք... իսկ եթէ գիտ-  
նայի՞ք...

— Ափսոսելու ոչինչ չը կայ, օրիորդ, ասացէք  
և կը գիտնամ:

— Հենց բանն էլ նրանումն է, որ չեմ ասի:

— Ի՞նչու...

— Որովհետև... չեմ կարող ասել. չի կարող  
ասել և ոչ մի աղջիկ, եթէ...

— Այն ժամանակ ես կը հարցնեմ ուրիշից:

— Ուրիշից. ո՞ւմնից. դուք այստեղ ծանօթ-  
ներ չունիք:

— Ա՛յ, օրինակ, ձեր մօրից:

Օրիորդը կամարակապ լօնքերը սեղմելով, նա-  
յեց նրան և հարցրեց.

— Իսկ եթէ մայրս ուզենայ գիտնալ, թէ ո՞վ  
տուեց ձեզ:

— Տէր Աստուած, այստեղ հօ մի գաղտնիք  
չը կայ. կասեմ, որ դուք տուեցիք:

Մօրս... Աստուած չանի, արգելեց Զաբէլը  
բարեկամական լանդիմանութեամբ:

Արմենակի հետաքրքրութիւնն աւելի ևս  
սաստկացաւ. նա չէր կարողանում հասկանալ, թէ  
ինչու արգելուած էր օրիորդներին կրկնելու այդ

ծաղկի անուէնը կամ ի՞նչու կարելի չէր ասել մօրը,  
թէ ծաղկը տուել է իւր աղջիկը: Եւ օրիորդին  
նեղը լծելու համար ասաց.

— Իմ հետաքրքրութիւնս այնքան լարեցիք,  
որ անպատճառ ուզում եմ իմանալ այս ծաղկի ա-  
նուէնը և հենց հիմայ կը հարցնեմ ձեր մօրից:

Ու վեր ելաւ տեղից աւելացնելով.

— Եթէ չէք ուզում, որ ուրիշից հարցնեմ,  
դուք ասացէք:

Օրիորդը շառագունեց, բայց սիրտ առնելով  
ասաց.

— Այդ ծաղկը կոչուում է... ս է վ դ ա չ ի չ է ի:

— Որ թարգմանի ս ի ը ո յ ծ ա զ ի կ, վրա-  
բերեց Արմենակը խորհրդաւոր ժպիտով:

Զաբէլը ամօթից շփոթուած՝ ձեռքը դրեց Ար-  
մենակի բերանին: Այդ անակնկալ հպաւորութիւնը  
էլէքտրական հոսանքի նման անցաւ նրա երակնե-  
րով և այդ տպաւորութեան տակ ասաց.

— Սքանչելի ծաղիկ է, սիրուն տեսքով և  
քաղցր համ ու հոտով... անուէն էլ խիստ լար-  
մարում է իրեն... ճիշտ որ սիրոյ ծաղիկ, որի  
իւրաքանչիւր մի թերթիկի տակ սէր է ննջում ու  
սէր բուրում... Բայց սա աւելի սիրուն է երևում  
ինձ այն պատճառով, որ ձեր ձեռքից ստացայ:

Զաբէլն աւելի ևս շփոթուեց ու նրա դէմքը  
ծածկուեց վարդի կարմրութեամբ: Արմենակի սուր



Թափանցող նայուածքից չը խուսափեց օրիորդի դէմքի ալլալուժը. նա արդէն գուշակուժ էր, որ նրա ներսը փոթորիկ է կատարուում:

— Որքան գեղեցիկ ու պաշտելի է, կրկնեց նա իւր մտքում, առանց աչքը նրանից հեռացնելու:

— Կիրակի օրը դուք էլ կը գտք Բէօյուկ-Ռարէ, խօսքը փոխելով, հարցրեց օրիորդը:

— Անպատճառ, եթէ եղանակը լաւ լինի, իսկ դ՞ուք, օրիորդ:

— Ե՞ս... չը գիտեմ. այդ կախուած է հանգամանքներէից:

— Ոչ մի պատրուակ, ցանկալի է, որ դուք անպատճառ գաք, ալլապէս...

— Մի՞թէ առանց ինձ կարելի չէ, հարցրեց նա չարածճի ժպիտով:

— Ամեն ինչ կարելի է, բայց կարելիների մէջ էլ տարբերութիւն կայ: Ա՛յ, օրինակ, ես էլ կարող էի այստեղ նստել առանց ձեզ, բայց այն հաճույքը չէի զգալ, ես էլ կարող էի կռանալ, պոկել այս սիրոյ ծաղկից ու հոտ քաշել, բայց սա չէր ունենայ այն համն ու հոտը...

— Օ՛հ, լաւ, լաւ, տարօրինակ մարդ էք, անճանաչելի:

— Անճանաչելի...  
— Այո՛... երեկ առաջին անգամ երբ տեսայ ձեզ շոգենաւում, լրագրի վրայ թեքուած, անցաւ մըտ-

քովս «Ի՛նչ սառն, ի՛նչ անտարբեր երիտասարդ է» և մէջս սառուցալին ցրտութիւն զգացի. լետոյ երբ տեսայ իմ և այն լիտի սպալի մէջտեղ կանգնած, ահարկու դէմքով և յուզումից ցնցուող շրթունքով, ասացի, «ահա՛ մի սառն բնաւորութիւն, որ կարող է կրակ կտրել, մի խաղաղ սիրտ, որ ընդունակ է ովկիանոսի նման յուզուելու», իսկ այժմ...

Օրիորդը կարծես զգալով, որ իւր խոստովանութիւնների մէջ շատ առաջ գնաց, յանկարծ ընդհատեց խօսքը:

Արմենակը հարցրեց.

— Այժմ ի՛նչպէս էք տեսնում, օրիորդ:

— Այժմ յուզուած ալիքները տափակել են և փոթորկալից գոռ ու գոչումի տեղ, ինչ-որ քաղցր ու թովիչ բանաստեղծութիւններ են մըմնջում... Ի՛նչպէս ուրեմն ճանաչել մարդու սիրտը:

— Շատ դիւրին կերպով:

— Օրինակ...  
— Որպէս օրինակ կը բերեմ ինքս ինձ. ահա՛:

Ասում էք, որ ես սառն ու անտարբեր էի. — այդ պէտքէ բացատրել նրանով, որ առաջին անգամն էի ձեզ տեսնում, ձեր ո՞վ և ի՛նչ լինելը չը գիտէի և մեր մէջ ոչ մի առնչութիւն չը կար: Ասում էք, որ ես՝ սառն ու անտարբերս, յանկարծ բռնկեցի, յուզուեցի: — Այդ էլ պէտք է բացատրել նըրանով, որ այն ըոպէին կատարուում էր մի ապօ-



ըննի գործ, որ արեւնակիցս էր անպատուում, որ թոյլն ու անգօրը ենթարկուում էր բարբարոսական բռնութեան հալածանքին, երբ կարելի չէր լուռ հանդիսատես լինել: Գանք երկրորդ կէտին, այնէ — թէ ինչպէս նախ՝ սառն, անտարբեր, ապա՝ յուզուած, փոթորկած սիրտը քնքշացել է... Գիտէք օրիորդ, ինչ զգայուն տարրերից է բաղկացած սիրտը. նա կարծես զգացումների աղբիւրն է... Ուրեմն նա, այդ սիրտը կարող է սառն, անտարբեր մնալ կամ յուզուել, փրփրել այն ժամանակ, երբ նրա շուրջը ամեն ինչ սէր ու քնքշութիւն է բուրում. կարող է նա չը գարթնել և թովիչ ու քաղցր բանաստեղծութիւններ չը մըմնջալ...

Օրիորդը ձեռքերը կրծքին խաչած լուռ լափըշտակութեամբ լսում էր այն բառերը, որոնք սթափեցուցիչ կաթիլների ներգործութիւն էին անում նրա անապական սրտի վրայ:

Մի քանի րոպէ այնպէս լուռ կանգնելուց յետոյ, ասաց.

— Հա՛, մի բան պիտի հարցնեմ: Երեկ երբ կանգնած էիք իմ և սպաների մէջտեղ, ես նկատեցի, որ դուք ձեր գրպանից դուրս հանեցիք փոքրիկ վեցհարուածեան ատրճանակը: Ի՞նչ էիք մտածում անել:

— Այդ ինքս էլ չը գիտեմ. բայց պէտքէ անէի այն, ինչ որ անհրաժեշտ էր, ինչ որ հան-

գամանքները կը թելադրէին:

— Ահա՛ տեսա՛ք, որ գէնքը լաւ բան է, թէ և հայրս հակառակ է այդ բանին:

— Զեր հայրը նոյնքան իրաւունք ունի: Զէնքը կըթուած, ինքնաճանաչ և պարտաճանաչ մարդու ձեռքում այն չէ, ինչ որ է մի անկիրթ, վայրենի մարդու ձեռքում: Ես գէնքի օգնութեան կը դիմէի այն դէպքում, երբ նա ներկայանար որպէս մի անխուսափելի պահանջ և երբ խիղճս արգարացնէր այդ քայլը:

— Ես էլ այդպէս եմ կարծում և հենց այդ անխուսափելիութիւնն էր, որ ստիպեց ինձ հովանոցը սպալի գլխին փշրելու... Հաւատացէ՛ք, եթէ գէնք ունենայի, կը գործածէի անվախ կերպով:

— Իսկ ես էլ հաւատացնում եմ ձեզ, որ միմիայն դրանով դուք դրաւեցիք ինձ. ասաց Արմենակը ժպտալով:

Զարէլն այս անգամ թեթեւակի միայն կարմըրեց և խօսքը փոխելով, հազիւ լսելի ձայնով կրկնեց.

— Չը մոռանաք, որ մօրս կարելի չէ ասել:

— Ի՞նչ կարելի չէ ասել, օրիորդ:

— Որ այդ ծաղիկը ես տուի ձեզ... առայժմ կարելի չէ...

Արմենակը խոստացաւ: Նրանք զրոյց անելով մօտեցել էին պատշգամբին: Կառքը պատրաստ



կանգնած էր, և ա. Օդեանը հիւրին ճանապարհ  
ձգելու համար իջնում էր ցած: Արմենակը սիրոյ  
ծաղիկը զգուշութեամբ թագցրեց բռան մէջ և  
սրտագին շնորհակալութիւն յայտնելով, կառքը  
մտաւ:

— Շուտ շուտ եկէք, ձայն տուեց Ջաբէլը,  
երբ կառքն առաջ սլացաւ:

VII.

«Սիրոյ-ծաղիկ» . . .

Վերադառնալով հիւրանոց, ծանր աշխատան-  
քից յոգնած, վաստակած մարդու նման Արմենա-  
կը պառկեց անկողնի վրայ: Վերարկուն մի կողմն  
էր շարտել, գլխարկը՝ միւս: Բայց սիրոյ-ծաղիկը,  
որպէս սրբութիւն, դեռ բռնած ունէր ձեռքում  
և միշտ կրկնելով նրա անունը, մօտեցնում էր  
քթին, շրթունքին: Միայն նրան թւում էր, թէ  
այդ ծաղիկն այլևս չունէր նոյն համն ու հոտը,  
նոյն գեղ ու գեղեցկութիւնը, որպէս առաջ, երբ  
ինքը դեռ նստած էր Ջաբէլի կողքին:

Ջաբէլը նոյնպէս անհանգիստ էր: Բէկեանին  
ճանապարհ ձգելուց յետոյ, նա ուրախ-ուրախ մը-  
տաւ տուն և ձեռքն առաւ ձեռագործը իւր սըր-  
տի քաղցր խոկումներին անձնատուր լինելու մըտ-  
քով: Նրան թւում էր, թէ կատարուել է այն գերբ-

նական բանը, թէ յայտնուել է այն անձ ա-  
նօթը, որին ձգտելիս է եղել իւր սիրտը. թէ  
այլևս իրեն ուրիշ բան չի մնում անել, եթէ ոչ  
հրճուել, հիանալ այդ գտած, յայտնուած ան-  
ձանօթ բանով: Էլ ոչ մի գաղտնի ան-  
հանգստութիւն, ոչ մի սրտի անձանօթ ճմլում,  
ոչ մի մղում դէպի անյայտը, անհասկանալին . . .  
Ու ձեռքն առաւ ձեռագործը այն յուսով, թէ մի  
ժամում տասն օրուայ գործ պիտի կատարի: Բայց  
Ջաբէլը հենց առաջին իսկ վայրկեանից զգաց, որ  
սխալում է, որ իւր մէջ ինչ-որ աւելի ուժեղ և  
աւելի անհասկանալի փոթորիկ է կատարուում, որ  
ինքը ոչ միայն չի կարողանում ասեղ շարժել,  
այլև անկարող է չորս պատերի մէջ սեղմուել, ո-  
րոնք կարծես ուզում էին ճզմել իրեն: Օդն էլ  
ծանր ու խեղդիչ էր թւում. նա ազատ շունչ  
առնելու պէտք էր զգում: Եւ մի կողմ շարտելով  
ձեռագործը, իջաւ ցած, դէպի պարտեզը: Այստեղ  
օդը ազատ ու մաքուր էր: Նա նայեց շրջապատող  
լեռների կատարներին, ծառերի սաղարթներին, Բոս-  
ֆորի ալիքներին, որոնք ամենքն էլ ներկուած լի-  
նելով վերջալուսի դեղնագոյն ճառագայթներով,  
մի հանդիսաւոր տեսք էին ընդունել: Մտաւ պար-  
տեզը, անցաւ այն շաւիղներով, որոնցով անցել էր  
Արմենակի հետ միասին, կանգնեց այնտեղ, ուր  
կանգնել և դիտել էին Բոսֆորի հրաշալի տեսա-



բանները: Տեղի ունեցած բոլոր խօսակցութիւնները, զրոյցները մի առ մի լիջեց նա և՛ վերջապէս, նստեց այն նստարանի վրայ, ուր նստել էին կողք կողքի: Շաղրուանը դեռ վեր էր զարկում. ջրի մանր կաթիլները նոյն կարգով թափուում էին աւազանի մէջ, խկ ոսկի ձկնիկները խաղ էին անում թափուող կաթիլների հետ: Հիւսիսային քամին դեռ փչում էր նոյն հոսանքով և ծառերը սոսափում էին, տերևները գրկուում համբուրուում, կարծես միմիանց բարի գիշեր մաղթելիս լինէին: Ահա այնտեղից ինքը պոկելով Սէվգա-չիչէին, տուել էր Արմենակին: Կտրուած ոստը, մեռած կմախքի նըման, դուրս էր ցցուած և նրա ծայրին անգամանդի նման փայլում էր մի կաթիլ ջուր... Ձաբէլին թլաց թէ դա գլխատուած ոստի արտասուքն է և սարսուաց: Իսկ այն միւս ծաղիկները, որոնք շրջապատել էին կտրուած, լացող ոստին: Ձաբէլի մտքով անցաւ, թէ նրանք էլ գլխիկոր ողբում են իրենց գլխատուած քրօջ վրայ ու սիրտը վշտաղին սեղմուեց:

Այս բոլորը թւում էր նրան. թւում էր նաև շատ բան ու անցնում, ցնդում առանց հետք թողնելու...

Բայց առաջ այդպէս չէր, օրինակ, մի ժամ առաջ այդպէս չէր...

— Ի՞նչու բնութիւնը տգեղ է, արևի լոյսն

այսպէս կարմիր: Ինչո՞ւ առարկաները կորցրել են իրենց գեղեցկութիւնը, ծաղիկներն իրենց անուշ բուրմունքը: Ի՞նչու չը կայ կեանք, կենդանութիւն, գրաւչութիւն... մըմնջաց նա:

— Որովհետև մենակ ես, կողքիդ չի նստած Արմենակը:

Այս ձայնից նա ցնցուեց, վեր թռաւ և ձեռքը բաբախող սրտին սեղմելով, նայեց շուրջը:

Ոչ ոք չը կար. շաղրուանն էր, որ աղմկելով զարկում էր վեր, ծառերն էին, որ սոսափում էին ու թռչնիկները, որ երգում էին իրենց օրամտի քաղցր մեղեգին: Նա միւս ձեռքն էլ սեղմեց կրծքին, այն անսովոր կերպով բաբախող կրծքին, որտեղից լսուել էր իւր հարցի պատասխանը:

Եւ երկու երիտասարդների համար օրերն անցնում էին այս կարգով: Արմենակը միշտ յաճախում էր Օդեանների տունը, նրանք միասին գնում էին զբօսնելու, գնում էին թատրոն, երեկոյթ և այլն, բայց ամեն անգամ, երբ բաժանուում էին, իւրաքանչիւրն իւր կարգում խոստովանում էր, որ այսօր երեկուանից աւելի բուռն է այն անձանօթ ծարաւը, աւելի մեծ ու խոր-զատարկութիւնը:

Ու անցկալի անհամբերութեամբ սպասում էին կիրակի օրուան, երբ միասին Բէօլուկ-Պարէ պիտի գնային, եթէ եղանակը արգելք չը դառնար:

Այդ օրից նրանք շատ բան էին սպասում...



Եւ վերջապէս սպասած կիրակին վրայ հասաւ: Օրը սպասածից պարզ ու զեղեցիկ էր:

Գէթ այսպէս էր թուում երկու երիտասարդներին:

Կիրակի օրը, առաւօտեան ժամի տասից առաջ, նրանք իջան կամուրջը և տասին մօտ մեկնող շոգենաւը մտան: Շոգենաւը սուլեց, կիսալուսինը ծածանեց բարձր կայմի վրայ և կապանքներն արձակելով, նաւը մի կոր գիծ կազմեց և մըտաւ Բոսֆորի ջրերի մէջ:

Հիւսիսից փչում էր սառն քամի, բայց չը նայելով դրան, Զաբէլն ու Արմենակը բարձրանալով վերի յարկը, կանգնել էին տախտակամածի վրայ: Մոյզ Ֆիրուզայի գոյն ջուրը հեշտալի շառաչելով ճեղքելով, շոգենաւն առաջ էր լողում, իւր ետև թողնելով երկու անիւնների, տակ ջարդուած, փշրուած զուգահեռական մի գոյգ գիծ: Գծերը աստիճանաբար հեռանալով, նմանում էին տեղտեղ արևի ոսկեգոյն ճառագայթներով ոսկէգօծուած երկայն ժապաւէնների:

Շոգենաւը սուլելով ու տնքալով միշտ լողում էր առաջ, որը ասիական և եւրոպական եզերքների մի քանի նաւամատուցներին հանդիպելուց յետոյ, վերջապէս կանգ առաւ Բէօյուկ-Ռարէի կայարանի առաջև:

Բէօյուկ-Ռարէն թրքական մայրաքաղաքի սի-

րուն արուարձաններից մէկն է, Բոսֆորի թագուհին: Նա ընկնում է Սև ծովին մօտ, եւրոպական ափի վրայ, տեղ տալով իւր մէջ դեսպանական ամառնային պալատներին և բարձրաստիճան անձանց ապարանքներին: Բոսֆորը իւր կապուտակ ու վճիտ ջրով բաց է նրա առաջև: Ծիծաղուն ալիքները, մանր ու ժպտուն, միշտ խաղ են անում գիշերը՝ լուսնի, իսկ ցերեկը՝ արևի ճառագայթների հետ: Քուն, դադար չունին, չարաճճի մանուկների նըման, վազում են իրար ետևից, իրար գաւակ թռչում, շփւում, ապտակում են միմիանց և այսպէս գրկախառն թաւալելով դալիս, զարկում են քարափին և կարծես քրքջալով կրկին փախչում, սուզում են ալիքների մէջ: Բայց այնքան քաղցր, այնքան հեշտալի է այդ աղմուկը, որ յափշտակում է մարդուս և թւել է տալիս, թէ գտնւում է Սերովբէ և Քերովբէների մի աստուածային երաժշտական հանդիսում:

Հենց այսպիսի տպաւորութիւն կրեց Արմենակը, երբ ոտք դրեց Բէօյուկ-Ռարէի ցամաքի վրայ:

Գուրգէն էֆ. նաւամատուցի տնակի առաջև կանգնելով, հանդիսաւոր եղանակով դարձաւ իւր ճանապարհորդակիցներին.

— Մեր ծովային ճանապարհորդութիւնը վերջացած է, ասաց նա,—մնում է ցամաքայինը. տեսնում եմ, որ՝ շնորհիւ վեհափառ սուլթանի, այսօր



երկինքը ամպելու և մեզ հալածելու տրամադիր չէ: Ուրեմն մենք կարող ենք հանգիստ խղճով վճռել մի շատ կարևոր հարց. . .

—Սի, դու էլ ճառախօսելու տեղ գտար, արևն այրում է, նկատեց տ. Օդեանը:

—Մի քիչ համբերութիւն և ամեն ինչ կը կարգադրուի, տիկինս: Դառնամ յարուցածս հարցին, կէս օրին մօտ է, առաւօտը ելանք առանց նախաճաշի, գիտեմ որ ամենքիդ ստամոքսն էլ խիստ նման բողոքում է: Պէտքէ մի քիչ էլ նրա բողոքին ականջ կախել. սակայն կուզէի քուէի դնել այս հարցը. կուզէք այստեղ, ճաշարաններից մէկում թեթև նախաճաշ անել, թէ ճաշել պաղ աղբիւրի մօտ, անտառի կանաչ թփերի մէջ:

—Ես ձեռնպահ եմ մնում, որովհետև անձանօթ եմ տեղական կարգերին ու սովորութիւններին, պատասխանեց Արմենակը:

—Իսկ ես, պ. Բէկեանի քուէն էլ առնելով, կասեմ, որ լաւ է ճաշել անտառում, ծառերի զով ստուերի տակ, վրաբերեց Զաբէլը:

—Դո՛ւք, տիկինս. . .

—Ես մտածում եմ, թէ ինչպէս պիտի վեր ելնեմ այս բլրակի գազաթը, քանի որ արդէն յոգնած եմ և հարթ ճանապարհով դժուարանում եմ քայլել:

—Պատիւ ունեմ զեկուցանելու, տիկինս, որ

վեհափառ սուլթանը դեռ չէ բարեհաճել իւր բարձրագոյն իրադէտով հրամայելու, որ կառքի ճանապարհ բացուին, բայց ժողովուրդը զրա միջոցը գտել է, եթէ թույլ տաք. . .

—Օրինակ ի՞նչ միջոց. . .

—Աւանակներ կան թէ արանց և թէ կանանց համար, որոնց վրայ հեծնում են, ոտքով գնալ չը բարեհաճողները:

—Աւանակի՞ վրայ. . .

—Այո՛. . . Քրիստոս նրանով Երուսաղէմ գընաց և՛ ինչպէս լսել եմ, Արցախում ահագին համբաւ է վայելում:

—Ե՛հ, մի կողմ թո՛ղ կատակներդ. աւելի լաւ է ոտքով կը գնամ. եզրակցրեց տիկինը:

—Ուրեմն մնում եմ ես քուէս տալու: Լա՛ւ, ես միանում եմ Զաբէլին, որ պ. Բէկեանի քուէն էլ ունի և ձայների բացարձակ առաւելութեամբ, այն էլ՝ առանց միջադէպի, կնճռոտ հարցը լուծուում է այսպէս — ճաշել անտառի կանաչ թփերի մէջ, ծառերի զով ստուերի տակ և կոյս աղբիւրի եզերքում:

Ու մի քանի անհրաժեշտ կարգադրութիւններ անելուց լետոյ, սկսեցին բարձրանալ դէպի բլրակը:

Այդ բլրակներն ալիքաձև են, ծածկուած խիտ ու կանաչ անտառով: Նրանք նման են ծովի



հակայական ալիքների, որ շար ի շար առաջ գալով, Սե և Մարմարական ծովերը բաժանուում են միմիանցից: Նայողին թւում է թէ այդ բլրակները երբևիցէ երկու ծովերի մի մասն են կազմել, թէ եղել են յուզուած ծովի ալիքներ, որոնք ինչ-որ կախարդական գաւազանի հարուածով կամ տիեզերական մի ահեղ շնչով մի ակնթարթում տեղն ու տեղը հող են դարձել, որոնց կատարը ծածկող փրփուրէց առաջ է եկել այժմեան սաղարթախիտ անտառները:

Որքան առաջ էին գնում նրանք, այնքան զգալի էր դառնում Հիւսիսից փչող սառը քամին, այնքան օդը թարմանում, քաղցրանում էր, մարդուս թոքերը լցնելով մի ինչ-որ կենարար հեղուկով: Որքան դժուարին լինէր այդ գառիվեր թըփաստանի նեղ շաւիղներով առաջանալը, այնուամենայնիւ այդ դժուարութիւնները Չարէլին ու Արմենակին առանձին զուարճութիւն էին պատճառում: Չարէլը որպէս շաւիղներին վարժ մէկը, գնում էր առաջևից, իսկ Բէկեանը՝ ետևից: Այդտեղ բնութիւնը վիճելի, քննելի մի գրքի նման բացուած էր նրանց առաջև և որքան նիւթ կար խօսելու: Ահա բաղեղապատ խոր ու մուրթ որջեր, ուր կարծես դեռ մարդկային աչք չի թափանցել: Ահա հաստաբուն կաղնի, գլուխը դուռզարար դէպի վեր ցցած որ իւր հակայական ճիւղերի տակ

խեղդում է հազարաւոր ծառեր ու բույսեր: Ահա խոր, ոլորուն ձորակներ, կանաչի մէջ թաղուած, ուր շողին են տալիս նազանքով սահող վճիտ առուակները, որոնք կարծես փափկասուն կուսի շընորհայլի իրանը գրկող արծաթեայ գօտիներ լինին...

Արմենակը գնում էր, բայց յափշտակուած տեսարանների հարստութեամբ ու բուսականութեամբ, մոռացել էր և՛ յոգնածութիւն և՛ քաղց և՛ ամեն ինչ: Ու նայում էր անչափ, անզուսպ նայուածքով. նա աչքերով լափում էր ամեն բան:

Մի տեղ նա յանկարծ կանգ առաւ, որպէս թէ մի աներևույթ ձեռք գամեց նրան ու բացականչեց.

— Ահա բնութեան սքանչելիքը, նայեցէք, օրիորդ, այսպիսի բան կարող է ստեղծել ինքը բնութիւնը միայն:

Նրանցից քիչ հեռու գտնուող բարձր բլուրի գագաթից քիչ վար, ճեղքուած ապուռաժից դուրս էր բղխում ջուրը, որպէս մի ծորակից և ահագին բարձրութիւնից մեզմ շառաչիւնով գահավիժում էր ցած, ձորակի անդունդը: Օդի ճնշման տակ վրճիտ ջուրը գնալով սփռուում լայնանում ու մանրանում էր և փոշիանում էր դեռ կէս ճանապարհին չը հասած, ձևացնելով հիւսիսայգի շառաւիղներից մէկը: Թափուող, փոշիացող ջուրը իւր մէջ ցուացնելով արևի ճառագայթները, թւում էր թէ նա



բաղկացած է բիւրերանգ ակունքի և աղամանդների փոշուց:

Այդ փոքրիկ ջրվեժի փոշուց ձորակի մէջ կազմուած է փոքր առուակ և քարերին զարկուելով առաջ է սահում: Ամօթխած հարսի նման նա երբեմն դուրս է բերում դէմքը և կրկին թագցնում անտառի անթափանց պուրակներում, երբ դու այլևս նրան չես տեսնում, բայց ականջիդ հասնում է մի մեղմ, մի հազիւ լսելի խշշոց:

— Ահա բնութեան սքանչելիքը, կրկնեց նա Ձաբէլի ուշադրութիւնը այն կողմ դարձնելով: Տեսարանը կոյս է ու կախարդիչ: Տեսնում եմ այդ աղամանդների փոշին և աչքերս խողում են... Լսում եմ այդ ձայնը և սիրտս լցում է քաղցր զեղմունքով... Թւում է ինձ, թէ այդ խոր ձորի մէջ, անթափանց պուրակներում մարդկանց երեսից թագնուած հրեշտակներ են ապրում, որոնք երգում են այն Աստուածային քաղցր մեղեդին, որ Արարչի աթոռի առաջև ծունգ չոքած երգել են տիեզերքի ստեղծագործութեան առաջին օրում...

— Ա... տեսնում եմ, չափազանց լափշտակուող էք, պ. Բէկեան, մօտենալով, բացականչեց Գուրգէն էֆէնդին, — և իմ գրութեանս մասին չէք էլ հարցնում:

— Ձեր գրութիւնը... ինչ է պատահել Գուրգէն էֆէնդի:

— Երկու դժբաղդութիւն, մէկը միւսից աւելի ծանր... մէկ՝ որ տիկինս յոգնել է և դժուարանում եմ թեևս կրել նրա ծանրութիւնը, մէկ էլ որ քիչ մնաց, որ աւանակը պիտի գլորուէր ձորի անդունդը, տանելով իւր հետ մեր ճաշի ամբողջ պաշարը:

— Այդ խկապէս դժբաղդութիւն է, նկատեց Բէկեանը ծիծաղելով:

Իսկ Ձաբէլը լրջօրէն հարցրեց.

— Աւանակը ինչու էր գլորուում, հայր:

— Բարեհաճեցէք աւանակից իրենից հարցնել. նա այդ մասին դեռ ինձ բացատրութիւն չի տուել, սակայն հաւանական է, որ հաճելի չէ նրան այն, որ իւր բեռը մենք պիտի վայելենք, իսկ ինքը—ոչինչ:

— Եթէ այդպէս է, այդ աւանակը աւելի խելօք է այն մարդկանցից, որոնք աշխատում են, ուրիշների փորը լցնում, իսկ իրենք միշտ քաղցած են ու քաղցած, նկատեց Բէկեանը:

— Կատակը մի կողմ թողէք. խօսեց տիկինը յոգնածութիւնից հեալով. — դեռ շատ պիտի գնանք:

— Մի քիչ էլ. այ մինչև այնտեղ:

Գուրգէն էֆէնդին ցոյց տուեց ծառերով հովանաւորուած մի տափարակ, որ իրենցից շատ էլ հեռու չէր:

Ու շարունակեցին իրենց ճանապարհը:



VIII.

Բէօյուկ-Ռարէի կռնակին բարձրացող բլուրի գագաթից քիչ վար ընկած է մի հարթ ապառաժ, նման բնական ամբիոնի: Նրա առաջև դէպի արեւելք փռուած է Բոսֆորը, իսկ նոյն պատուանդանի տակ բացուած է ամենախոր և ահաւոր ձորերից մէկը: Ամբիոնը երեք կողմից շրջապատուած է սաղարթախիտ ծառերով: Այդ ծառերը տարածելով իրենց ճիւղերը, հիւսում են միմիանց հետ, ապառաժի վրայ ձևացնելով մի բնական տանիք, ծածկուած ծառերի հետ վեր բարձրացող պատուտակների ու բաղեղների գոյնգոյն ծաղիկներով:

Այդ տեղը իւր վայրենի գեղեցկութեամբ միշտ գրաւել էր Չարէլին. այդ պատճառով էլ, ճաշից յետոյ, Արմենակին առնելով, բարձրացան այնտեղ: Տեսարանը Բէկեանի վրայ էլ ուժեղ տպաւորութիւն գործեց: Ամբիոնի վրայ կողք կողքի կանգնած, լուռ ու անշարժ նայում էին բնութեան այդ անձեռագործ տեսարանին, որն իւր վայրենութեան մէջ ունէր ինչ-որ մի գերազույն գեղեցկութիւն: Նայում էին իրենց ոտքերի տակ բացուող կանաչ անդունդին և դէպի ալեծովի Բոսֆորը, դէպի հեռաւոր լեռանց ալիքները, որոնք գնալով նոսրանում, մշուշանում էին և լուծւում կապոյտ

հորիզոնի մէջ: Տեսարանի տպաւորութիւնը այնքան զօրեղ ու հարուստ էր, որ թւել էր տալիս նրանց, թէ գտնուում են մի բոլորովին անծանօթ մոլորակի վրայ, ուր դեռ ամենայն ինչ կոյս է ու անարատ, որը մարդկային շնչով դեռ ապականուած չէ: Որքան նիւթ կար խօսելու, ինչ հրաշալի բաներ՝ միմիանց ցոյց տալու. բայց լուռ էին. նրանց տիրում էր մի տեսակ սրբազան ընդարմացում, վերին յափշտակութիւն, որպիսին երևակայել կարող չէ ոչ մի մահկանացուի երևակայութիւն:

Ծիշտ այդ ժամանակ, այդ հանդիսաւոր բուպէին, մի գոյգ փոքրիկ թռչնիկներ ծառի դալար ոտի վրայ թառած, երգում, դալլալում էին: Նրանք իրենց կիսախուփ աչքերը դարձրած դէպի այն կողմ, դէպի ուր նայում էին Չարէլն ու Արմենակը, կարծես այդ փոքրիկ արարածներն էլ յափշտակուած լինէին. որոնց անուշ մեղեդին բնութեան գեղեցկութեան հետ մի դիւթական ներդաշնակութիւն էր կազմում:

— Ի՛նչ լաւ է այսպէս... որքան դիւթական...

Նաղելի գլուխը անգիտակցաբար Արմենակի ուսին լինելով, ասաց Չարէլը, որպէս թէ ինքը իւր սրտի հետ խօսելիս լինէր:

— Այս տեսարանը միշտ գրաւել է ինձ. շարունակեց նա. — այստեղ միշտ մի անծանօթ, անբացատրելի բան եմ զգացել իմ մէջ... Այժմ էլ



զգուճ եմ նոյն բանը և թուում է ինձ, թէ աշխարային զգացումները խոյս են տուել ինձնից. թէ գտնուում եմ մի սրբազան մթնոլորտում, աստուածային ինչ-որ լոյսով պարուրուած . . . Ի՞նչ է այս չը գիտեմ . . . Բայց որքան երջանիկ եմ . . .

Արմենակը նոյն երջանկութեամբ գիտովցած, գրկել էր օրիորդի ճկուն իրանը և յափշտակութեամբ լսում էր նրա խօսքերը, ենթադրելով, թէ իւր ականջների տակ դալլալում է ինքը՝ սիրոյ սգին:

Այդ ժամանակ մի նապաստակ, չը գիտես ինչից խրտնած, ճեղքեց թփերի հիւսուածքը, հանգիսաւոր լռութիւնը մի ըսպէ վրդովելով:

Իսկ Չարէլը անսպասելի դարձաւ Բէկեանին ու հարցրեց.

— Թռչնիկներն էլ սիրո՞ւմ են արդեօք . . .

— Թռչունները . . . բայց ինչու արիք այդ հարցը:

— Այդ հարցն արծարծեցին իմ մէջ՝ այլ, այն թռչնիկները, որ իրար կողքի թառած դալլալում են . . . ինձ այնպէս է թուում, թէ նրանք սիրախօսում են . . . Ու շարժում են նախանձս:

— Թռչնիկները իրենց ենթադրեալ սիրախօսութեամբ շարժո՞ւմ են ձեր նախանձը:

— Այո՞ . . . բայց գիտէ՞ք ինչու:

— Ո՛չ. ես այդ չը գիտեմ:

— Որովհետեւ նրանք երջանիկ են . . . Նայեցէք նրանց. հեռու ընկերական բամբասանքից, կեանքի հոգս ու վշտերից ազատ, անծանօթ արհեստական այն պայմաններին, սովորութիւններին ու օրէնքներին, որոնցով կաշկանդուած ենք. բլուրների այս բարձրութեան վրայ, կոյս ու կանաչ անտառի թաւուտքի մէջ, յայտնում են իրենց սէրը, հաղորդում են միմիանց քաղցր երգերով, սըրտառուչ բանաստեղծութեամբ . . . Սրանք չը գիտեն, թէ ինչ է ամօթը, որ յաճախ սանձ է դրնում սիրահարների շրթունքին. թէ ինչ է սիրոյ դաւաճանութիւնը . . .

Ու սևորակ աչքերը Արմենակին դարձնելով եզրակացրեց.

— Սիրող թռչնիկներն աւելի երջանիկ են, քան սիրող մարդիկ:

— Այդ ճիշտ է, հաստատեց Արմենակը և յանկարծ միտքն ընկնելով, խօսք բաց արեց չոգենաւում տեղի ունեցած խօսակցութեան մասին մօր հետ և հարցրեց, թէ ինչ էին նշանակում:

— Այն օրը ինձ դուրս էին բերում հրապարակ ցոյց տալու մի երիտասարդի, որին այսօր էլ չեմ ճանաչում, բայց որը եթէ հաւանէր, իմ ձեռքը պիտի խնդրէր: Ճիշտ այդպէս հրապարակ են դուրս բերում ծախու անասուններին և այդ վրաւորում էր ինձ . . . Լաւ էր, որ փոթորիկը խան-



գարեց, եթէ ոչ գուցէ նշանուած լինէի:

—Նշանուած... .

—Այո... .

Արմենակը լուեց. բայց մտածում էր, որ եթէ այդ բանը տեղի ունենայ այժմ. ինքը կարող է խելքը կորցնել:

Եւ կարօտագին նայուածքով նայեց օրիորդին:

—Ի՞նչու եկանք այստեղ, բացականչեց Զաբէլը ձեռքը լուգուած կրծքին սեղմելով:

Արմենակը կրկին նայեց օրիորդին: Նա արդէն հասկանում էր, որ աղջկայ կրծքի տակ փոթորիկ է կատարուում, որ այն-ն ու յիշ-ը կռիւ են մղում: Գիտէր, որ այդ փոթորիկը վերջապէս պիտի պայթի, սակայն ուզում էր, որ նա պայթի շուտով, հենց այժմ:

• Եւ հարցրեց.

—Մի՞թէ զղջացի՞ք, որ եկանք այստեղ:

—Զը գիտեմ... Բայց կրկնում եմ, որ թւում է ինձ, թէ մօտեցել եմ արարչութեան, թէ գբտնում եմ երկդիմութիւններով ու գաղտնիքներով լի կեանքի մակերևոյթից շատ վեր, այնքան վեր, ուր սրտերն ազատ են զգում իրենց սիրով բաբախելու և իւր լեզուները չեն կաշկանդւում սրտի զգացումները թարգմանը հանդիսանալու:

Բէկեանը կամացուկ ձեռքն իջեցրեց նրա գլխին:

Զաբէլը միւս թւն էլ նրա վզով փարելով, բուռն սիրոյ գինովութեամբ, մշուշապատ աչքերը վեր բարձրացրեց ու մըմնջաց.

—Ել չեմ նախանձում թռչնիկներին... Նըրանք երգում են, բայց չեն խօսում... Սակայն չը գիտեմ, Արմենակ, զգո՞ւմ էք, որ... սիրում եմ ձեզ... Դուք էլ սիրո՞ւմ էք... .

Արմենակը չը պատասխանեց. նա այքան լուգուած էր, որ անկարող էր խօսել: Բայց բառերի, խօսքերի այլևս կարիք չը կար. նա խոնարհեցրեց գլուխը և նրանց շրթունքը մօտեցան միմիանց...

Հանդիպակաց ճիւղի վրայ թառած թռչնիկները դեռ երգում էին իրենց սիրոյ մեղեդին և երգում էին այժմ աւելի բարձր, աւելի զգածուած դալալիկներով, որպէս թէ արդէն հասկացել էին կուսական երկու շրթունքների համբույրի արժէքը և որոնց անուշ դալալիկները արձագանք էին տալիս զոյգ սիրող սրտերի մէջ:

IX.

Այդ դէպքից մի քանի շաբաթ, լետոյ Բէկեանը Պարիզում հետևեալ նամակն ստացաւ իւր մօրից.

«Սիրելի՛ գաւակս.

«Պօլսից գրած նամակդ ստացայ, որին պա-



տասխանելով, շտապում եմ ուրախութիւնս յայտնել քեզ, ինձ անծանօթ օրիորդ Զաբէլի հետ նըշանուած լինելուդ մասին: Ներողութիւն ես խնդրում, որ առանց ինձ նշանուեցար և յոյս ես յայտնում, թէ չեմ գլանալ տալ հաւանութիւնս... Այո՛, ես այդ չեմ գլանալ քեզնից... ընդհակառակը, կը փափակէի օր առաջ գրկել հարսնացուիս ու համբուրել նրան, որին այնքան գովում ես:

«Գրում ես թէ Զաբէլի հետ պայմանաւորուել ես առաջիկայ նոր տարու արձակուրդներին ինձ հետ Պօլիս գնալ և օրինաւորապէս նշանուելուց լետոյ, կրկին վերադառնալ ուսումդ շարունակելու... Շատ լաւ ես մտածել, բայց աւելի ուրախացրեց ինձ այն, որ Զաբէլն էլ հետներս պիտի գնայ Պարիզ մանկավարժութիւն ուսանելու... Ձեռ կարող գուշակել, թէ որքան ուրախացրին ինձ այդ լուրերը և թէ ինչպէս սիրտս լցուած է ազնիւ հպարտութեամբ քեզ նման որդի, և Զաբէլի նման հարսնացու ունենալուն համար...»

«Ինձ ամենեւին չի զարմացնում այն, որ գուշակելի ծնողաց մասին ոչ մի խօսք չես գրում: Այդ բնական է, որովհետև Զաբէլից բացի ուրիշ ոչ մէկն աչքիդ չի ընկնում և չի հետաքրքրում: Թող այդպէս լինի, սիրելի որդեակս:

«Թէ ինչպէս պետքէ կարգադրել, որ միաժամանակ գտնուենք Պօլսում, այդ մասին մտա-

ծելու և ծրագրելու դեռ ժամանակ շատ ունենք. ուստի առայժմ զրկում եմ քեզ մայրական ջերմ համբույրներս:

«Քեզ կաթոգին սիրով սիրող մայրդ...»:

X.

1890 թ. Դեկտեմբեր 31-ի իրիկունն էր:

Գուրգէն էֆ. Օդեանի ապարանքը տօնական կերպարանք էր ստացել: Հսկայական դահլիճը, որ զարդարուած էր կէս թրքական կէս եւրոպական ճաշակով և լուսաւորուած մոմերով ու ջահերով, լիքն էր ընտիր բազմութեամբ: Հիւրերը դեռ շարունակում էին գալ և ամեն մէկի ներս մտնելով, դահլիճում՝ կարծես՝ նոր ոգի էր տիրապետում, նոր զրոյցներով ազմկում:

Պատուաւոր հիւրերի շարքում գտնուում էր նաև թաղի քարոզիչ սրբազանը: Այդ օրը երեկոյեան ժամի մօտ տասին, արևելեան ճեպընթաց կառախմբով Պօլիս պիտի ժամանէր Բէկեանը իւր մօր հետ, երբ՝ ըստ կանխագոյն որոշման, տեղի պիտի ունենար նրա նշանադրութեան հանդէսը, օրիորդ Զաբէլի հետ:

Տ. Օդեանը իւր որդու և մօտիկ ազգականներից մի քանիսի հետ գնացել էին Սիրքէջի կայարանը հիւրերին դիմաւորելու, իսկ հիւրերը դեռ



մի երկու ազատ ժամեր ունենալով, զրոյց էին անում:

Թրքահայերի համար այդ թուականներում զրոյցի առատ նիւթ կար: Տեղի էր ունեցել Գում-Գաբուի դէպքը. Աշրգեանը պատրիարքական գահից պինդ կպած, պոկ չէր գալիս. Սահմանադրութեան վրայ ճնշում էր բանեցւում կառաւարութեան կողմից, տեղի էին ունեցել անթիւ ձերբակալութիւններ. բանտերը լիքն էին անմեղ հայերով և յոյս կար թէ նոր տարու առթիւ նրանք պիտի ազատուեն բանտից: Որովհետև Պօլսեցիք առհասարակ խոյս են տալիս հարցերի վրայ կանգ առնելուց և վիճաբանութիւնից, այդ պատճառով ընդհանուր բնաւորութիւն կրող հետաքրքիր հրնութիւնների ու նորութիւնների մասին խօսելուց լետոյ, խօսքը դարձաւ առօրեայ մանր մունր երեւոյթներին: Հիւրերից մէկը, որ Քաղաքական ժողովի անդամ էր, պատմեց թէ ինչպէս մի աղքատ կին, չորս անչափահաս երեխաներին հետն առած, ահա մի քանի օր է, ինչ մաշում է պատրիարքարանի դուռը, թափում է աղի արտասուք, քարերն է լիզում, որ օգնութեան ձեռք մեկնեն իրեն— ոչ ոք ուշադրութիւն չի դարձնում այդ մարմնացեալ թշուառութեան վրայ... Նա աւելացրեց, որ դեռ գտնւում են մարդիկ, որոնք ծաղրում են խեղճի աղքատութիւնը, նրա մերկութիւնը, նրա դողոց

ու ցնցումները ձմեռնային ցուրտ եղանակից:

— Թոյլ տուէք ես պատմեմ ձեզ մի այդպիսի դէպք, որ տեղի է ունեցել Կովկասում և որը թէև արդէն հնացած է, բայց շատ բնորոշ, ասաց Գուրգէն էֆէնդին Քաղաքական ժողովի անդամը պատմութիւնը վերջացնելուց լետոյ:

Հիւրերը ոչ միայն գոհ մնացին, այլև խնդրեցին, որ պատմէ, առարկելով թէ ըստ ժամանակագրութեան, սուրհանդակ գնացքի գալուն դեռ մի ժամից աւելի կայ:

Գուրգէն էֆէնդին աթոռներից մէկի վրայ նստելով, սկսեց.

— Ինչպէս գիտէք, քառասնական թուականները թրքահայերի վերածնութեան առաջին թուականներն են և թուրքիայի պատմութեան մէջ, բացառապէս հայերիս վերաբերմամբ, փայլուն էջերից մէկն են կազմում: Իհարկէ այս ասում եմ թուրքիան թուրքիայի և թրքական պատմութիւնը թուրքիայի պատմութեան հետ համեմատելով: Սահուան ու արիւնի վրայ հաստատուած այդ պետութիւնը, հուր ու սրի վրայ հիմնուած այդ կառաւարութիւնը կարծես զգում էր, որ քաղաքակրթութեան հոսանքը վերջ ու առաջ պիտի սրբէ, մաքրէ աշխարհիս երեսից բարբարոսութեան ախտեղութիւնները: Պէտք էր որոշ չափով համակերպել ժամանակի պահանջներին, այնպիսի պահանջ-



ներին, որոնց գանցառութիւնը կարող էր փութացնել պետութեան կործանումը: Թուրքիան արդէն վաղուց թողել էր իւր յարձակողա—նուածողական, քաղաքականութիւնը և պաշտպանողական դիրք էր բռնել թէ արտաքին և թէ ներքին թշնամիների դէմ: Թուրքիայի խելօք քաղաքագէտները ընդունում էին բնութեան այն օրէնքը, որով բնաւորութեամբ ու բաղադրութիւնով հակառակ տարրերի խառնուրդից միշտ սպասելի է բորբոքում, պայթում: Իսկ թուրքիան հենց այդպիսի տարրերից էր բաղկացած և վաղուց էր, որ ներքին շփոթութիւնները սպառնում էին նրան պետական քայքայում:

«Այս կրիտիքական վիճակի մէջ էր թուրքիան:

«Տիեզերական պատրիարքի վարկն ընկած էր յունական ապստամբութիւնից լետոյ, իսկ յոյն ժողովուրդը մի փոքրիկ հող ձեռք բերելուց լետոյ, կարծես ամեն ինչ վերջացած էր համարում և գոհ մնալով ստացած արտօնութիւններից, միտք էլ չունէր գործօն դեր խաղալու:

«Բալկանեան թերակղզու միւս ազգութիւնները նոյնքան կասկածելի էին կառաւարութեան աչքում և բացի այդ, նրանցից ոչ մէկը թուրքիայում ցոյց չէր տուել ո՛չ քաղաքական, ո՛չ ֆինանսական և ո՛չ էլ վարչական մի առանձին ընդունակութիւն:

«Մնում էր հայ տարրը:

«Հայը երկար տարիներ թրքական ծանր լուծը կրելուց լետոյ էլ ոչ միայն անհամեմատ աւելի խաղաղ էր և հաւատարիմ, այլև թուրք պետութեան տուել էր նշանաւոր գործիչներ քաղաքական, ֆինանսական և վարչական պատասխանատու ասպարէզներում, որոնցից շատերը վայելում էին սուլթանի անձնական սէրը և բարեկամութիւնը:

«Սակայն արեւմտեան ազգերի մտքերը յուզող քաղաքական հրատապ խնդիրները և այն էվօլուցիան, որի առաջ մէկը միւսի ետեւից տապալում էին սոցիալական հին կարգերը, հին օրէնքները, որոշ չափով ազդում էին նաև հայերի վրայ: Նրանք կարծես հասկացել էին միութեան նշանակութիւնը: Եւ նրանց մէջ սկսուել էր մի տեսակ շարժում: Այն, այդ շարժումն էր, որ հիմք դրեց համբարային միութեան, որը մի տեսակ սպառնական միութիւն էր ամիրայական միահեծանութեան դէմ: Բայց երևաց, որ համբարային միութեան գաղափարը շատ նեղ է, ուստի այդ միութիւնը ընդլայնելով, կազմեցին թաղական միութիւններ, որտեղից ծագեց սահմանադրութեան գաղափարը:

«Օսմանցին՝ իհարկէ՝ քնած չէր, ոչ էլ հայկական շարժումները տեղի էին ունենում գաղտնի կերպով: Հպատակ ազգերի յարաբերութիւնները և նրանց գործունէութեան եղանակը սահմանող ո-



րոշ օրէնքներ չը կային: Սրա հետ մէկ տեղ Սուլթանի կառաւարութիւնն էլ տրամադիր չէր խըստութիւններ բանեցնելով, հայերին էլ զինելու իւր դէմ, որոնց դատը արդէն մի անգամ դրուած էր եղել Պարիզում գումարուած վեհաժողովի քաղաքական շահմատի վրայ: Կարծողներ կան թէ այդ թուականների շարժումները պաշտպանուած էին դեսպանների կողմից և թէ 1861 թ. ստորագրած Սահմանադրութեամբ հայերը պարտական են նրանց գործ դրած ճնշման Սուլթանի վրայ. սակայն այդ ճիշտ չէ: Այլ փաշան, որ թուրքիայի ամենահեռատես քաղաքագէտն էր համարուած, համոզուած լինելով, որ թուրքիան իւր գոյութիւնը կարող է պահպանել միմիայն աստիճանական բարենորոգումների շնորհիւ, նա թոյլ էր տալիս, որ այդ փորձն անեն իրենք՝ հայերը և նկատելով թաղական միութիւնների տուած արդիւնքը, աջակցում էր Սահմանադրութեան ստորագրելու գործին:

Գուրգէն էֆէնդին իրեն մատուցուած սուրճը ընդունելով, շարունակեց:

«Մինչև այժմ պատմածս մի նախաբան էր կամ այսպէս ասած, բուն պատճառը այն դէպքի, որ խօստացայ պատմել ձեզ:

«Ինչպէս դիտէք, Սահմանադրութեան ներշնչած ոգևորութիւնը այնքան մեծ էր, որ խօսքով դժուար էր պատմել: Որպէս մայրաքաղաքում,

նոյնպէս և գաւառներում բացուեցին բազմաթիւ դպրոցներ կրթական ժամանակակից մեթոդով: Մայրենի լեզուն, որ անարգուած ու հալածուած էր և որը այնքան վնասուած էր հայերի կուլտուրական առաջադիմութեան, սկսուեց աւանդուել նորաբաց դպրոցներում: Զարմանալի է մտածել, թէ ազգի միահամուռ աշխատութեան առաջև ինչպէս խորտակուած, փշրվում էին ամենախոշոր արգելքները, տալով հրաշալի արդիւնք: Գարաւոր հալածանքի ու ճնշման տակ հոգեւարք հայը բանալով աչքը, յանկարծ ինքն իրեն գտել էր կեանքի մի նոր և ուժեղ հոսանքի մէջ: Ել կանգ առնելու, մտածելու ժամանակ չը կար. պէտքէր գնալ հոսանքի ուղղութեամբ, որ տանում էր դէպի այն լոյսը, որ նշմարուած էր արդէն պատուած տգիտութեան վարագոյրի ետև: Իսկ դէպի լառաջ փոխած ամեն մի քայլը նոր կեանք, նոր ոգի էր ներշնչում նրանց . . .

«Գէորգ Գ. Կաթողիկոսը, որ եռանդուն մասնակցութիւն էր ունեցել թրքա հայերի շարժման գործում, բազմելով Ս. Լուսաւորչայ գահի վրայ, Կովկասը շատ լեա ընկած գտաւ: Մայրենի լեզուն, ազգային դպրութիւնը կամովին վտարուած էր: Թիֆլիսի նահանգի հայերը խօսում էին վրացերէն, Շուշուայ, Գանձակի և Երևանի բնակիչները իրենց հայ գիւղորայքով խօսում էին միտեսակ պարսկա-



խառն հայերէնով: Նա գիտէր, որ լեզուն ազգային գոյութեան ամենագլխաւոր սատարներից մէկն է, ուստի վճռեց ի կատար ածել այն միտքը, որ իւր նախորդները՝ զանազան անկախ պառճառներով չէին կարողացել զլուխ բերել: Այն է—Ս. Էջմիածնում, Մայր-Տաճարին կից, Կաթողիկոսական Մայր-Աթոռի աչքի առաջև կանգնել հոգևոր ձեմարանը . . .

«Այդ թուականներում մասնագիտութիւնս Պարիզում աւարտելով, հենց նոր վերադարձել էի Պօլիս, երբ մի օր հայրս ասաց, որ Կաթողիկոսը վճռել է ձեռնարկել Էջմիածնի ձեմարանի կառուցման գործին, խնդրել է, որ յայտնի ճարտարապետների կարծիքը հարցնելով, նրանցից աւելի ձեռնհաս մէկին ուղարկէ Վաղարշապատ:

— «Զի կարելի, որ այդ պաշտօնը ինձ յանձնէք, ասացի ես, ճարտարապետութիւնը մասնագիտութիւնս է և զուր չէ, որ ոսկի մեդալլ եմ ստացել:

«Հայրս հաւանութիւն տուեց և յանձնելով ինձ նաև մի խոշոր գումար յօգուտ կառուցանելի ձեմարանի, ճանապարհ ձգեց:

«Ուրախութեանս չափ ու սահման չը կար: Արհամարելով նոյեմբեր ամսի սովորական փոթորիկները Սև ծովի վրայ և ցուրտն ու բուքը ցամաքի վրայ, ճանապարհ ընկայ դէպի Ս. Էջմիածին:

«Ինչ երջանիկ օրեր, ինչ ոսկի յոյսեր ու երազներ, որոնք սակայն անակնկալ կերպով խորտակուեցան, մի խոր, շատ խոր սալի միայն թողնելով սրտիս վրայ, որը երբէք կարող չէ ջնջուել» . . .

Եւ Գուրգէն էֆ. լուեց. նրա դէմքն արտայայտում էր խորին վիշտ . . .

### XI.

«Իմ ճանապարհորդութիւնը Պօլսից մինչև Ս. Էջմիածին տևեց ընդամենը տասնուհինգ օր, թէև այդ տասն և հինգ օրը ինձ համար տասն ու հինգ շաբաթից աւելի երկար տևեց: Մի փոքր շունչ առնելուց և սուրճի դաւաթը դատարկելուց լետոյ, շարունակեց Գուրգէն էֆէնդին: — Սակայն մինչև տեղ հասնելս, ձեմարանի կառուցման հարցն արդէն լուծուած էր: Բացի այդ լոյս ընկան այնպիսի անկախ պատճառներ, որ իմ այնտեղ մնալը ոչ միայն աւելորդ էր, այլև անկարելի: Ուստի Ս. Կաթողիկոսի աջն առնելով, փշրուած սրտով վերադարձայ Թիֆլիս, հայրենիք վերադառնալու մտքով: Դեկտեմբերի կիսումն էր, սաստիկ ցուրտ ու փոթորկալից մի եղանակ: Սակայն այդ նոյնքան աննկատելի անցաւ ինձ համար, որքան Պօլսից Էջմիածին գնալիս: Որպէս յոյսերով վառուած, նոյնպէս յուսախար մարդուն կարծես չեն ազդում բը-



նութեան խստութիւնները: Այդ եւս փորձել եմ իմ անձի վրայ:

«Թիֆլիս հասնելով լսեցի, որ ճանապարհը մինչև Փոթի փակուած է, իսկ Սև ծովի վրայ չը տեսնուած փոթորիկ ու ալեկոծութիւններ են տեղի ունենում: Ստիպուած էի ամանօրի տօները Կովկասի մայրաքաղաքում անցնել, ուր ոչ մի ծանօթ չունէի: Օրերը ձանձրալի էին անցնում, բայց՝ չը գիտեմ ինչու՝ Կեկտեմբեր 31-ը ամենատխուր օրերից մէկն էր: Ի՞նչեր ասես չէին անցնում մըտքովս: Հիւրանոցի կիսախաւար, ցուրտ և փոքրիկ սենեակում փակուած, աչքիս պատկերանում էր Պօլիսը, լատկապէս այդ տօների համար զարդարուած լիք խանութները. ուրախ դէմքեր, ծանօթ անձնաւորութիւններ. վերջապէս մեր տունը—հայրըս, մայրս, ազգականներս, որոնք ուրախութեամբ պիտի դիմաւորէին նուիրական տօներին, պիտի լիզէին ինձ, առանց իմանալու, որ լուսախար ընկած եմ Թիֆլիսի հիւրանոցում և վիշտը կրճուած է սիրտս . . .

«Ինձնից քիչ հեռու լսեցի երեկոյեան զանգակի ձայնը, որ հնչեց ականջիս նոյնքան տխուր ու մեղամաղձոտ, որքան տխուր էի ես: Թէև երկինքը ծածկուած էր համատարած մոխրագոյն ամպով, բայց երևում էր, որ արևը շատ էլ բարձր չէ: Փչում էր ոչ զօրեղ, բայց խիստ ցուրտ քամի:

Հաստ մուշտակի մէջ փաթաթուելով դուրս ելայ փողոց: Չնայելով մինչև մարդուս ոսկրները թափանցող ցուրտ քամուն, այնուամենայնիւ փողոցներում բաւական բազմութիւն կար. ամենքն էլ ուրախ, ամենքն էլ բեռնաւորուած զանազան կապոցներով, գոյնզգոյն թղթերի մէջ փաթաթած: Տներից լսում էին դայիրայի, երգի ձայներ և այլ ուրախ աղաղակներ, որոնք շարժում էին նախանձս:

«Մի քանի ծուռ ու մուռ փողոցներ անցնելուց լետույ, վերջապէս առաջևս բացուեց այն ճանապարհը, որ տանում էր Վանքի մայր եկեղեցին: Նոյն փողոցով դէպի եկեղեցի էին գնում նաև մի քանի ալևոր տղամարդիկ ու պառաւ կանայք, իսկ զանգակները դեռ հնչում ու հնչում էին:

«Եկեղեցու բակը մտնելիս ուշադրութիւնս գրաւեց մի բան և ակամայ կանգ առայ: Այն սարսափելի ցրտին, բարակ հագուստի մէջ, բարակ շալը գլխին ձգած, որ հասնում էր մինչև իրանը, կանգնած էր մի մանկահասակ աղջիկ: Նրա դէմքը կապտել էր, իսկ ցրտի սաստկութիւնից դուրս ցայտած արտասուքի կաթիլները սառել, բիւրեղացել էին նրա թշերի վրայ:

«Ու ամբողջ մարմնով դողում էր:

«...Ժամի դրնում գողգողալով  
Կանգնած է մի աղքատ կին,  
Նրա հանդերձ պատառ-պատառ,  
2ունի շապիկ իւր հագին» . . .



«Այս երգը յանկարծ միտքս եկաւ, երբ նայեցի այն խեղճին: Բայց մանկամարդ աղջկայ հագուստը պատանու պատանու չէր. նա չէր նմանում աղքատի, այն սովորական աղքատներին, որոնց միշտ հանդիպու եմք: Միմայն թէ կանգնած էր ժամի դրնում, երկիւղած կերպով մեկնում էր ձեռքը անցկացողին, ուր ոչ ոք ոչինչ չէր գնում:

«Պարիզի աղքատներին աչքովս տեսել էի և նրանց մասին կարգացել շատ բան, սակայն ինչ ահագին տարբերութիւն նրանց և այս աղջկայ միջև:

«Ես մօտեցայ նրան:

— «Մի՞թէ չէք մըտում, հարցրի:

— «Ցուրտ է, սաստիկ ցուրտ, պատասխանեց նա, բայց կարկամած բերանում շխիշխկացող սկուաներն արգելեցին շարունակել:

«Շատո՞ւց է կանգնած էք:

— «Շատուց . . .

— «Եւ ոչ ոք ոչինչ չը տուեց, խեղճ աղջիկ:

— «Ոչինչ . . . պատասխանեց հառաչելով:

— «Անունդ ինչ է:

— «Լարգուհի . . .

— «Հայր, մայր չունիք:

— «Հայրս վաղուց է մեռել, մայրս մեռաւ մի քանի ամիս առաջ, խնամքիս թողնելով երկու որ-

բիկներ:

— «Խեղճ . . . դուրս թռաւ շրթունքիցս:

«Նա նայեց ինձ. կարծես նրան զարմացնում էր իմ կանգնել զրոյց անելս ու ցաւակցելս:

— «Որքան դրամով կը բաւականանաք, հարցրի:

— «Չոր հացի և քիչ ածուխի գին, պարոն . . . մի կտոր հաց որբիկներին կերակրելու և քիչ ածուխ՝ նրանց սառած մարմինը տաքացնելու . . .

«Ես նրան տուեցի մի տասն լուբլիանոց. խոստանալով կրկին օգնել, պատուիրեցի գնալ և հարկաւոր բաներն առնել: Տասն լուբլին առաւ, նայեց ինձ, երբ տեսայ, որ ուզում է շնորհակալութիւն անել, բայց բառեր չի գտնում:

«Խեղճ աղջիկ, գուցէ այդ չնչին դրամը նա մի շատ մեծ բան էր համարում. փրկանքի գին էր կարծում: Բայց մի՞թէ իրաւունք չունէր այդպէս կարծելու. մի՞թէ նոյն պայմանների մէջ բիւրաւորները բարոյապէս կամ ֆիզիքապէս չէն մեռնում, որոնք կարող էին ապրել, եթէ մի քանի լուբլի ունենային:

— «Վուք դրտեղ էք ապրում, հարցրի:

«Նա ինձ ասաց իրենց տան հասցէն, որ մինչև օրս էլ լաւ լիչում եմ:

— «Լա՛ւ, գնացէք. ասացի ես և շտապեցի եկեղեցի: Ինձ այնպէս թւաց թէ մի ժամ առաջ



կապարի լեռան նման սրտիս վրայ ծանրացող տըխ-  
րութիւնը արդէն գլորուել էր և ինքս ինձ զգում  
էի այնքան թեթև ու այնքան ուրախ:

«Ամբողջ գիշերը քունս չը տարաւ. Վարդու-  
հին չէր հեռանում աչքիցս և միշտ երևում էր  
ինձ ժամի դրանը կանգնած, ցրտից դողալիս և  
արտասուքի կաթիլները այտերի վրայ բերեղացած:

«Միւս օրը բաւական ուշ զարթնեցի: Փողոց-  
ներն արդէն լիքն էին շնորհաւորական այցելութիւն-  
ներ անող բազմութեամբ: Ամենքն էլ ուրախ էին,  
ամենքն էլ ժպտադէմ ու գոհ: Բայց Վարդուհին  
էլ գոհ էր: Ես դուրս ելայ հիւրանոցից և շտա-  
պեցի նրա մօտ, երեկուայ մուրացիկ աղջկայ վիճակի  
հետ ծանօթանալու: Թիֆլիսի փողոց կոչուած լաբի-  
րինթոսի հետ անծանօթ լինելով, շատ էլ հեշտ  
չեղաւ նրա տունը գտնել, բայց վերջապէս գտայ:  
Աւելորդ եմ համարում նկարագրել տեսածս, ան-  
շուշտ դուք գիտէք թէ ինչ վիճակ կարող է ու-  
նենալ մի անփորձ աղջիկ, որ ոչինչ չունի, բայց  
ունի իւր խնամքին թողած որբիկներ և զգալով  
դէպի այդ փոքրիկներն ունեցած պարտականու-  
թիւնը, ստիպուած է մուրալու...»

«Բեկուած սրտով վերադարձայ հիւրանոց:

«Հայրս, ինչպէս գիտէք, միլիոնների տէր էր  
ու սերուած ամիրայական տոհմից: Ես այդ տոհմի  
արիւնն էի կրում երակներէս մէջ և կեանքիս մեծ

մասն անցրել էի Պարիզի ազատ մթնոլորտում:  
Բայց սրա հետ մէկտեղ պէտք է ասեմ, որ մի  
տարօրինակ բնաւորութիւն էի ներկայացնում:  
Ամեն ինչ իմ մէջ հաստատուած էր ծայրայեղու-  
թիւնների վրայ: Սէր կամ ատելութիւն — երկուսն  
էլ իմ մէջ բուռն էին: Չափաւորութիւնն ինձ ան-  
ծանօթ էր: «Լաւ է ոչ սիրել, ոչ էլ ատել, քան  
սիրել կամ ատել չափով, կշիռով» — այս էր իմ հա-  
ւատամքը, իմ դօգման: Ամեն բան անելուց առաջ  
ինքս ինձ հարց էի տալիս «կարո՞ղ եմ հոգով, սըր-  
տով նուիրուել նրան»: Եթէ այո, ես անում էի.  
եթէ ոչ — հրաժարուում:

«Հիւրանոցում նստած մտածում էի: Վառա-  
րանի մէջ ճարճատում էր այրուող փայտը և կայ-  
ծեր արձակում: Վարդուհին իւր պարզ ու համակ-  
րելի վարմունքով, իւր կախարդիչ պարկեշտու-  
թեամբ գրաւել էր ինձ: Նա նմանում էր հասա-  
րակ մետաղի շրջանակի մէջ ամրացրած մի թան-  
գագին ադամանդի: Վեանքի պայմանները, լինին  
աղքատ կամ ճոխ, մարդու արժանաւորութեան վը-  
րայ ոչինչ չեն աւելացնում, այլ մարդն է, որ այդ  
պայմանների միջից աչքի է զարկում իւր իսկական  
արժէքով: Ինքս իմ մէջ ամփոփուած, ես մտա-  
ծում էի շատ այսպիսի բաների մասին, իմ ներսը  
կատարուող ինչ-որ յեղաշրջման մասին, որ թուում  
էր ինձ թէ շատ նման է սիրոյ զարգացման:



«Սակայն Վարդուհին աղքատ էր. մուրացիկ մի աղջիկ էր և դեռ երէկ էր, որ ժամի գրնում կանգնած պարզում էր ձեռքն անցկացողներին. . . Ես սաստիկ ամաչում էի, որ հարուստ եմ ծնուել, որ պայմանների ոսկի շրջանակի մէջ եմ գրուած: Այդ օրն աւելի լաւ համոզուեցի թէ ժողովրդային դասակարգութիւն ասածդ գրութիւնը ինչ խոր անդունդ է բաց անում մարդկանց միջև և ինչպէս բաժանում է մարդկանց իրարից սրտով, հոգով ու գաղափարով: Ու մտածում էի, որ եթէ ես էլ նրա նման մի մուրացիկ լինէի ժամի գրան միւս անկիւնում կանգնած և սրտիս մէջ զգայի նոյն թրթրումը, ինչպէս այժմ, համարձակ կը մօտենայի նրան ու կասէի — Օրիորդ, մենք պատկանում ենք միևնոյն դասակարգին, ճակատագիրը մեզ ձգել է միևնոյն պայմանների ու վիճակի մէջ. եկ միացնենք մեր ճակատագրերը, ես քեզ սիրում եմ. . .

«Ե՛հ, կեանքի մէջ շատ անհետեւեթ բաներ կան: Կրանցից մէկն է ժողովրդային դասակարգերի մէջ եղած խտրութիւնը: Մէկը հարուստ է, կանգնած բարձր գիրքի վրայ. միւսը աղքատ է և կանգնած ստորին աստիճանի վրայ. սակայն սրբանք կեանքի ամենաթույլ ցնցումներին չը զիմացող մի-մի անհիմն ու խարխուլ շէնքեր են. . . Տեղի ունեցաւ լանկարծ այդ ցնցումը, մէկ էլ տես-

նես — առաջինները վերջինների, վերջինները առաջինների տեղն են գրաւել:

«Այս հարցի մասին ես երկար վիճեցի ինքս ինձ հետ և վերջապէս յաղթանակը տարայ: Այդ յաղթանակը յօգուտ օրիորդի էր: Ինչիս է պէտք թէ նա աղքատ է, ամիրայական արիւն չի կրում երակների մէջ. . . Ինչիս է պէտք հասարակաց կարծիքն այն հարցում, որ բացառապէս ինձ է վերաբերում. . . Կեանքի երկաթի պայմաններով շրջանակուած այն առարկան, որ մարդիկ անպէտք ու չնչին կարծելով, ոտքի տակ են տալիս, տրորում, — ես գտել եմ, որ նա ազամանդ է և թանգազին ազամանդ: Այս արդէն բաւական էր ինձ և վճիռս որոշ ու վերջնական. . .

«Երեկոյեան ժամի հինգն անց էր, երբ դուրս ելայ հիւբանոցից: Յուրաք աւելի սաստկացել էր. սառը քամին սրի նման կտրում էր մարդուս դէմքը, լուսամուտները ծածկուած էին սառույցի հաստ շերտով. բայց փողոցներում դեռ ահազին բազմութիւն կար, որոնց վրայից ողբից խմբիչքների հոտ էր փչում: Տներից լսում էին քէֆի երգի աղմուկներ, ծափահարութիւն, թմբուկ, մուզիկայ բոլորը խառնուել էին միմիանց, ներկայացնելով մի տեսակ վայրենի երաժշտութիւն: Բայց այդ ամենը ինձ վրայ այն ազդեցութիւնը միայն ունեցան, որ աննկատելի կերպով հասայ Վարդուհու



բնակած տուներ:

«Ռուսը բաղխեցի. ինքը՝ Վարդուհին բացարեց և ըստ երևույթին չափազանց զարմացաւ իմ անակնկալ և անժամանակ այցելութեանս վրայ:

— «Իրաւունք ունիք, օրիորդ, ինձ չէիք ըստպատում, ասացի ես շփոթուած:

«Նա ոչինչ չը պատասխանեց:

«Ես աւելացրի.

— «Տագնապալից ժամեր անցրի, օրիորդ, և սրտիս ձայնին անսալով եկայ ասելու որ... ձեզ սիրում եմ... մի մերժէք ինձ ձեր ձեռքը. խոստանում եմ երջանիկ անել...»

«Նա հազար գոյն փոխեց, այնուամենայնիւ գլուխը բարձրացնելով ասաց.

— «Ինչպէս տեսնում եմ, կարծել էք, որ ժամի դրնում անտէր աղջիկ էք գտել և մտածել էք ձեր հարստութեամբ շլացնելով, ինձ ձեր թակարդը գցել... Բարեգործութեան դիմակի տակ այդպիսի հրէշաւոր գործեր շատ են պատահում... Բայց սխալուել էք, պարոն, լետ վերցրէք այն բոլորն, ինչ որ ձեր դրամով է գնուած... Ձեր վարմունքն աւելի ծանր է ինձ, քան մուրացկանութիւնը...»

«Ու երկու քայլ լետ գնաց:

«Ես գլուխս կորցրի, զգալով, որ նա իրաւունք ունէր: Նա էլ ժողովրդային դասակարգու-

թեան մասին կարող էր ունենալ նոյն համոզումը, որպիսին ունի ամբողջ մարդկութիւնը: Եթէ ծանր է բարձրից ցած նայել, նոյնքան ծանր է ցածից վեր նայելը: Ուրեմն շատ բնական էր, որ իմ առաջարկը կեղծ երևալով, նրան վիրաւորուէր. բայց ունենալով արժանապատուութեան զգացում, ինձ մերժէր...»

«Բայց ես լետին միտք չունէի. նպատակս անկեղծ էր ու սուրբ: Այդ համոզումը քաջալերեց ինձ և ասացի.

— «Ձեզնից առաջ, օրիորդ, ես ինքս եմ մտածել այդ մասին և արդէն յայտնեցի, որ տագնապելի, տաժանելի ժամեր եմ անցրել, մինչև որ հաշտուել եմ ձեզ մօտ գալու մտքի հետ... Եւ չը գիտեմ, ինչով և ինչ լեզուով հաւատացնեմ ձեզ, թէ սիրում եմ և ամենևին չեմ խաբում:

«Վարդուհին գլուխը քարշ արեց, երևում էր, որ նրա ներսը բուռն կռիւ էր կատարում: Ապա գլուխն բարձրացնելով ասաց.

— «Երդուեցէք ձեր պատուի վրայ...»

«Ես երդուեցի և զգացի որ իմ կեանքիս մէջ մի այդպիսի անկեղծ երդում ոչ արել էի, ոչ էլ երբևիցէ կանէի:

«Այն ժամանակ նա թույլ տուեց, որ հետս վերցրած մատանին անցնեմ իւր մատը:



XII.

— Միջանկեալ պիտի ասեմ, որ այս դէպքի մասին սկսեցի պատմել աւելի այն պատճառով, որ փեսայացուս, որին այսօր սպասում ենք իւր առաջան հանդիպած օրում յանկարծ զարթեցրեց իմ մէջ նրա յիշատակը և այն օրից ի վեր մոռանալ չեմ կարողանում. մի փոքր լռութիւնից յետոյ ասաց Գուրգէն Էֆէնդին և շարունակեց իւր պատմութիւնը:

«Ասացի, որ մատանին անցրի Վարդուհու մատը, որ նշանակում է—նա դարձաւ իմ ընտրեալը, խօսեցեալը: Այդ մասին միւս օրն և եթ նամակ գրեցի հօրս, խնդրելով, որ անյապաղ ուղարկէ ինձ ամուսնութեան համար անհրաժեշտ թղթերը: Որովհետև ես արդէն երեխայ չէի, ուստի կասկած չունէի, որ հայրս հաւանութիւն կը տար: Իմ վտահոտութիւնը այնքան մեծ էր, որ շտապեցի յարմար բնակարան վարձել Վարդուհու համար, ըստ պատշաճի կահաւորեցի և միւսնոյն ժամանակ գնեցի կամ պատուիրեցի պատրաստելու հարսանեաց անհրաժեշտ պէտքերը:

«Ինչ երջանիկ օրեր էին... Իհարկէ ես ապրում էի հիւրանոցում, բայց մենք շարունակ միասին էինք լինում: Եւ որքան մօտ ու լաւ էի ճա-

նաչում նրան, այնքան աճում էր սէրս, որովհետև օր չէր անցնում, որ ես նրա մէջ չը նկատէի մի նոր աղնուլթիւն, նոր յատկութիւն:

«Բայց այն ժամանակ, երբ մենք անձնատուր էինք եղել սիրոյ արբեցութեան, ժամանակը իւր գործը կատարում էր. օրերն ու շաբաթները սահում էին մէկը միւսի ետեւից: Սակայն Պօլսից դուրսը չը կար: Օրերի անցնելու հետ միասին, օրիորդի մէջ ինչ-որ գաղտնի մտահոգութիւն էի նկատում: Անշուշտ նա մտածում էր թէ ինչ կը լինի եթէ Պօլսից մերժում ստանամ և իհարկէ զգում էր, որ դա մի ծանր հարուած կը լինի, որ ինքը ինչ-որ կախարդական քնից զարթնելով, ինքն իրեն պիտի գտնի նախկին թշուառ վիճակի մէջ, որպէս ժամի դրնում կանգնած մի մուրացիկ...

«Բայց այդ մտահոգութիւնը տևում էր շատ կարճ. նա էլ երևի արդէն ճանաչել էր ինձ և համոզուած, որ ես երդումս չեմ դրժի...

«Ներեցէք սիրոյ մասին երկու խօսք ասել. գիտեմ որ սէրը մի առեղծուած է, որին ես լաւ բացատրել չը պիտի կարողանամ, բայց կասեմ այն, ինչպէս հասկանում եմ, ինչ որ ես զգում եմ:

«Ինձ թւում է թէ սէրը ունի իւր սեփական աչքը, սեփական գիտակցութիւնը, ըմբռնումը, միտքը: Մենք նայում ենք առարկաներին գանազանու մենք սեն սպիտակից, մեծը փոքրից, գեղե-



ցիկը տգեղից... Այս բոլորը թւում է մեզ և այս թւում է - ն հաստատում են բոլոր մեզ պէս աչք ունեցողները: Սակայն մեր տեսածը իրերի արտաքին երևույթն է և այն խոշորացուցի գիմեղու հարկ չունեցող խոշոր երևույթը, այնինչ նոյն այդ իրերի ներքինը, միջուկը, որ աւելի հետաքրքիրն է, մեզ անտեսանելի է, որովհետև մեր աչքերն նրանց ներսը թափանցելու ընդունակութիւնից զուրկ են: Օրինակ հարիւր մղոն հեռավորութեան վրայ զուք տեսնում էք մի լեռ, մոխրագոյն ու լերկ, թէև նա ծածկուած է խորթ ու բորթով և հսկայական ծառերով: Դուք տեսնում էք նաև ինձ ու լսում խօսքերս, բայց միթէ ձեր աչքերն ընդունակ են տեսնելու նաև այն, թէ ինչ է կատարում իմ ներսը, մտքիս, սրտիս ու հոգոյս խորքերում...

«Սակայն երկու միմիանց սիրող զուգերը, եթէ ոչ առաջին օրից, գէթ հանդիպումի և նախասիրոյ երկրորդ շրջանում, նրանք միմիանց շատ լաւ են ճանաչում և որպէս մի բաց գիրք, նրանք կարդում են միմիանց մտքերը, սրտերն ու հոգիները և տեսնում այն բոլորը, ինչ որ անցնում է նրանց մէջ... Վերջապէս սիրոյ աչքին հայելանում է սիրեցեալի ներքին աշխարհը իւր բոլոր մանրամասնութեամբ...

«Ուրեմն զարմանալի չէ, որ մենք լիովին հաս-

կանում էինք միմիանց հոգու դարձուածքները:

«Եթէ մարդս տուփանքի զգացումին լաղթելու չափ ուժեղ կամք ունենայ, դիւրաւ կարող է հասկանալ, թէ ինչ տարրերից է բաղկացած իւր սիրեցեալը, որքան համապատասխան է իրեն: Իսկ այսպիսի դիպուածում ամուսնական դժբախտութիւններ շատ քիչ կը պատահեն:

«Բայց ես շեղուեցի:

«Բուն բարիկենդանին մի երկու շաբաթ մնացած, երբ նստած էինք ճաշի սեղանի վրայ, կրկին խօսք բացուեց մեր ամուսնութեան մասին.

— «Ի՞նչ կանես, եթէ հայրդ հաւանութիւն չը տայ, հարցրեց Վարդուհին:

«Ես դրական շեշտով ու խորին համոզմունքով պատասխանեցի

— «Դա անկարելի է...

«Նա մտազբաղ կերպով նկատեց.

— «Այնուամենայնիւ օրերն անցնում են:

«Ես աշխատեցի հանգստացնել նրան և արդարացնել հօրս:

— «Նա երբեմն ամիսներով բացակայ է լինում քաղաքից, ասացի. պատասխանի ուշանալը ես դրանով եմ բացատրում:

«Ես տեսայ, որ Վարդուհու նախազգացումը հակառակն էր պնդում, թէև աշխատում էր այդ բանը թաղցնել ինձնից:



«Ես վրայ բերի.

— «Վարդուհի, ես մասամբ ուրախ կը լինեմ, եթէ մեր ամուսնութիւնը մեզանից անկախ պատճառով մի քանի ամսով յետաձգուի:

«Նա հարցական կերպով նայեց ինձ:

«Ես կրկնեցի.

— «Այո, ուրախ կը լինէի. մի շատ լաւ ծրագիր եմ կազմել, որին անշուշտ կը հաւանես

— «Ի՞նչ ծրագիր...

— «Սքանչելի ծրագիր... այ օրինակ եթէ մինչև բուն բարեկենդանի վերջին օրերը թղթերն ստացուին, մենք իհարկէ կամուսնանանք, իսկ եթէ ոչ, այն ժամանակ ակամայ պիտի յետաձգենք: Այն ժամանակ գարունը կը բացուի, բնութիւնը կը զարդարուի... Մենք կը գնանք Վաղարշապատ և Ս. Էջմիածնայ տաճարում կը կատարենք մեր պսակի խորհուրդը... Զ՞է որ մեզ արգելոյ չը կայ... Դու չես եղել Էջմիածնում, բայց անշուշտ գիտես, թէ որքան նուիրական մի վայր է նա հայերիս համար... Նա հայութեան սիրտն է, մեր խնկելի պապերի սուրբ արիւնով լուացուած ու օծուած սիրտը... Ինձ թուում է թէ այնտեղ, այն սրբազան կամարների տակ միշտ սաւառնում են մեր վեհաշուք պապերի սուրբ հոգիները... Այդ նուիրական տաճարի մէջ, նրա երկնակառօց կամարների տակ, մեր խնկելի պապերի ս. հոգիների

ներկայութեամբ կը տանք մենք միմիանց մեր յաւիտենեկան սիրոյ անդառնալի երդումը, կը կռենք մեր ամուսնութեան նուիրական դաշինքը, ուխտելով...

«Ո՛հ ի՞նչ սրբազան ուխտ, ի՞նչ վսեմ նպատակներ...

«Այդ ամենը, որ վերջն այնքան անողոք կերպով փշրուեցին, այնքան ինձ ոգևորել էին, որ ներեցէք համարձակութեանս, համբուրեցի իրեն և բաժակս բաժակին զարկելով ասացի.

— «Միաճնի Իջման տաճարը ահա՛ տասնուհինգ դար է, որ գոյութիւն ունի... Նրա վրայ թագաւորներ, թագուհիներ ու իշխաններ են բանել, իրենց հաւատքի ու արտասուքի շաղախով յօդել նրա իւրաքանչիւր մի քարը միւսի հետ... Քանի՛ քանի թագադրութիւններ, իշխանական ամուսնութիւններ, կաթողիկոսական սուրբ օծումներ են տեղի ունեցել նրա սրբազան կամարների տակ... Սուրբ Էջմիածնի կենացը, Վարդուհի, նրա յաւիտենակութեանը...

«Եւ դատարկեցինք մեր բաժակները... Այդքան թանգագին ու անոյշ բաժակ երբէք այլևս դատարկած չեմ:



XIII.

«Ձատկական տօներից յետոյ, մի օր առաւօտեան ժամի մօտ տասին հիւրանոցի սպասաւորը տուեց ինձ մի փակ ծրար: Նամակը կրում էր իմ հասցէն, և գրուած էր Վարդուհու ձեռքով: Նա առաջին անգամն էր. որ ինձ նամակ էր գրում և գրում էր ահա թէ ինչ.

— «Սիրելի Գուրգէն.

— «Գիտեմ սրանով մեծ վիշտ եմ պատճառում քեզ, բայց ստիպուած եմ գրել. . . Երեկ իրիկունը քո գնալուց յետոյ, ինձ մօտ եկաւ մի անծանօթ պարոն, բարձրահասակ, ինչպէս դու, արծուի աչքերով ու քթով, տարիքը մօտ վաթսուներեք:— Գուրգէնի հարսնացուն էս, հարցրեց:— Այն, պատասխանեցի ես: Նա ասաց— Ես Գուրգէնի հայրն եմ. . . Քո հայրը, Գուրգէն, քո հայրը: Ուղեցի չոգել և ձեռքը համբուրել: Նա արգելեց և աւելացրեց.— Ձեզ սպասեցնել տուի, կը ներէք ինձ: Բայց ահա ինքս եմ եկել և եկելեմ ձեզ հետ խօսելու մի շատ լուրջ խնդրի մասին. . . Գիտէք, իւրաքանչիւր մի մարդ ծնուած է կեանքի մէջ իւր որոշ դերը կատարելու. Գուրգէնը ծնուած է մեծութեան ու փառքի համար, որպիսի ասպարէզները լայն բացուած են նրա առաջ: Սակայն մարդիկ

շատ դժուար են հասկանում իրենց բուն կոչումը և կօշկակարութեան համար ծնուածը լանկարծ ընտրում է զիտնական ասպարէզ և ընդհակառակը կամ որևէ մի սխալ որոշմամբ իւր առաջև փակում է լառաջադիմութեան ճանապարհը: Գուրգէնը ձեզ ընտրելով իրեն հարսնացու, խորտակում է իւր ամբողջ ապագան. . . Ուրեմն եթէ ձեր սէրըն անկեղծ է և անշահ, դուք պէտքէ հրաժարուէք նրա կիներ դառնալու մտքից. . . Հօրդ խօսքերը շանթահարեցին ինձ. հազիւ թէ կարողանում էի ինքս ինձ կանգուն պահել: Ես նայեցի նրա երեսին: Երևի իմ նայուածքի մէջ կար և յանդիմանութիւն և աղաչանք և ամեն ինչ, որովհետև նա իսկոյն ասաց— Ես չեկայ ձեզ ստիպելու. . . խօսում եմ յանուն ձեր սիրոյ և թողնում եմ ձեր ազատ կամքին. . . միայն աւելորդ չեմ համարում կրկնելու, որ այդ պահանջում է ձեր սիրած տղամարդու շահերը: Ես չը կարողացայ ինքս ինձ զբուսել ու հարցրի թէ ինչու նա կամենում է. որ միմիայն ես անեմ այդ ծանր զոհաբերութիւնը. . . Նա պատասխանեց ինքնավստահ շեշտով— Որովհետև ես հաւանութիւն տալ չեմ կարող, թէ ինչու, այդ իմ գաղտնիքն է. . . Ես իհարկէ կարող էի գնալ որդուս մօտ և նոյն բանը պահանջել նրանից. բայց չարեցի այն հեռատեսութեամբ, որ նա տղամարդ է և կարող էր մերժել ինձ: Այդ



մերժումից առաջ կը դար մեր յարաբերութիւններէ խզումը. ուրիշ խօսքով նա կը զրկուէր ժառանգութեան իրաւունքից: Այդ է պատճառը, որ վճռեցի նախ դիմել ձեզ: Իմ համոզումը կանանց մասին ընդհանրապէս շատ էլ նպաստաւոր չէ, բայց գիտեմ, որ ջերմ սիրով սիրող կանայք աւելի ընդունակ են ծանր զոհաբերութիւններ անելու, քան տղամարդիկ: Դա բացառութիւն կազմող կանանց բացառական յատկանիշն է, որով կարող են պարծենալ: Ես իհարկէ չը գիտեմ, թէ դուք ո՞ր դասակարգին էք պատկանում, ուստի կրկին լիշեցնում եմ, որ եթէ յամառելու լինիք, ստիպուած կը լինեմ դարձնելու երեսս և վարուելու քիչ առաջ ասածիս նման... Ընտրեցէք որն էլ կուզէք... Երևակայիր Գուրգէն, թէ որքան ծանր ու կրիտիքական էր դրութիւնս: Յանուն սիրոյ պահանջում էին, որ ես հենց այդ սէրը զոհ բերեմ ինչ-որ ինձ անհասկանալի մի քմահաճութեան և պահանջում էին սպառնալիքով հանդերձ: Ոչինչ էին իմ աչքում փառք, պատիւ, հարստութիւն: Եթէ ինձ մնար, քեզնից չը զրկուելու համար ես կը զոհէի այդ բոլորը, կը զոհէի ամեն ինչ... Բայց միթէ դուէլ կը զոհէիր... Ես անպայման հաւատացած եմ, որ դու կանէիր աւելին, քան ընդունակ է անելու մի թոյլ ու անզօր աղջիկ, որի մէջ բնաւորութիւնը դեռ կազմակերպուած

չէ, սակայն այդ բոլորը, մանաւանդ ձեր հօր լաւիտենեկան բաժանումը չը պիտի դառնար մի սև բիծ մեր ամուսնական կեանքի պայծառ երկնքի վրայ և այդ կարծեցեալ փոքր բիծը ժամանակի ընթացքում լայնանալով ու բարձրանալով չը պիտի մթազնէր մեր կեանքի հօրիզօնը... Նախազգացումը, որ երբէք չի խաբել ինձ, ասում էր, որ այդ բանը տեղի պիտի ունենայու մեծ ճիգ գործ դնելով վրաս պատասխանեցի հօրդ — Ես համաձայն եմ... (ո՛հ հերոս հօգի, բացականչեց Գուրգէն էֆ. խօսքի մէջ) Այդ ես արի յանուն քո ապագայ երջան կուտեան, փառքի ու մեծութեան, որ քեզ համար դուշակում է հայրդ: Ապա հայրդ առաջարկեց ինձ ընդունել մի խոշոր գումար, որպէս ապահովութիւն... Ես մերժեցի... Ա՛խ միթէ կարող էի որևէ գումարով ծախել սէրս... (վեհանձըն աղջիկ) Երբ նամակս ստանաս, ես այլևս քաղաքումս չեմ լինի և յանուն մեր դժբախտ սիրոյ երգուեցնում եմ քեզ, որ չը մտածես ինձ որոնել... Միշտ դժբախտ պիտի լինիմ, բայց դժբախտութեանըս մէջ էլ չը պիտի դադարեմ քեզ լիշելուց և քո մասին աղօթելուց:

Քո դժբախտ Վարդուհի»:

Գուրգէն էֆէնդին այս տխուր լիշողութեան տպաւորութեան տակ մի րոպէ քարշ արեց գլուխը, ապա դարձաւ հիւրերին.



— Մի պահանջէք, պատմել ձեզ, թէ որպիսի տպաւորութիւն թողեց վրաս այդ նամակը. դա մի ուսմբ էր. բայց ոչ, ուսմբը թեթեւ է, ոչինչ է. դա մի ահեղ կայծակ էր, որ անսպասելի պայթեց գլխիս: Այդ բոլորէն եթէ ձեռքս ընկնէր հայրս, գուցէ պատառոտէի... թողնել ճակատագրի կամքին մի աղջիկ, որ ոչ ոք չունէր և դեռ մի քանի ամիս առաջ ժամի դրնում դողդողալով ողորմութիւն էր խնդրում — այդ անկարելի էր. անկարելի էր մանաւանդ այժմ երբ նա... լի էր: Կատաղած առիւծի նման դուրս թռայ նրան որոնելու, սակայն մի շաբթուայ անդադար որոնումներս այն հետեանքն ունեցան, որ ձեռնունայն ու լուսահատ վերադարձայ հիւրանոց...

Գուրգէն էֆ. խօսքը դեռ չէր վերջացրել, երբ դուրսն աղմուկ լսուեց: Այդ աղմուկը հանում էին սպասած թանգազին հիւրերը նրանց զիմաւորողներին հետ: Ապա դահլիճի դուռը բացուելով ներս մտաւ Արմենակ Բէկեանը իւր մօր հետ:

Հիւրերը մի մարդու նման ոտքի ելան ի պատիւ նորեկների:

— Ահա Ձաբէլս, որին այնքան փափագում էիր տեսնել, ահա և իւր հայրը, ասաց Արմենակը:

Տ. Բէկեանը գրկաբաց զիմեց Ձաբէլին, բայց հենց այդ ժամանակ նրա և Գուրգէն էֆ. նայու-

ածքները հանդիպեցին միմիանց: Կարծես սառը ջուր թափուեց նրանց գլխին: Երկուսն էլ կանգնած էին դէմ ու դէմ միմիանցից մի երկու քալ հեռաւորութեան վրայ: Նրանց աչքերի մէջ պարզ նկատելի էր թէ զարմանք և թէ տարակուսանք:

— Հենց նոր վերջացրի այն տխուր դէպքի պատմութիւնը, որ տեղի ունեցաւ սրանից քսան տարի առաջ. կարծես ինքը իւր հետ խօսելով ասաց Գուրգէն էֆէնզին:

Որքան ծանօթ էր տ. Բէկեանին այդ ձայնը, այդ գանգալի նման հնչիւն ու քաղցր ձայնը:

— Ո՛հ ինքն է... նա ինքը, տէր Աստուած...

— Այո և ի՛նչ զարմանալի զուգադիպութիւն...

Տ. Բէկեանը ոչինչ չը պատասխանեց. նա ժողովելով բոլոր ուժերը խլեց Ձաբէլի ձեռքը և դարձաւ որդուս:

— Բո՛լորդ է, Արմենակ ջան քոյրդ...

Ու ուժասպառ ընկաւ որդու թևերի մէջ:

— Բո՛լորդ... շնորհակցին բոլորը:

Ու տիւրեց խորին, անթափանց լուութիւն...





Faint, illegible text, likely bleed-through from the reverse side of the page. The text is arranged in approximately 15 horizontal lines.

11



« Ազգային գրադարան



NL0359453



42.800

